

# Apocalipsis

## *Ndayá quem librěsañe yomna*

<sup>1</sup> Quemuentše entsábemana ndayá Běngbe Bětsá Jesucristbioye tbojaninñinýé, chě Běngbe Bětsabe oservéněnga cha cháuinñanýema, ndayá jopásama yojtsobecuama chěnga chamotsetatšěmbuama. Jesucristo chama chabe ángel tbojichmó, chě soyěngama atše, Juan, chě Jesucristbe oservenábioye chašuinñinýema. <sup>2</sup> Y atše sěnjayana lempe ntšamo ndegombre yomncá lempe chě tijinýe soyěngama, chě Běngbe Bětsabe buayenana soyěngama y chě Jesucristo šonjaniyana ndegombre bětsemna soyěngama.

<sup>3</sup> Oyejuayá nda tojtsalía, y oyejuayěnga nděmuanýenga botamana tmojtsuenana quem yochjopása soyěngama, chě muentše entsabemancá ndegombre tmojóyeunanga, er chca jopasa tempo entsobeco.

## *Asia luaroca ošbuachiyěngcá enefjuaněnga jacheuayama*

<sup>4</sup> Atše Juan, sěntsabiamná chě Asia luaroca canýsěftañe ošbuachiyěngcá enefjuaněngbiama. Atše, Běngbe Bětsá sěntseimpadana, tšabe bendicioněnga chábiocana chašmosháchiñe y ainaniñe puerte tšabe ebionana chašmotsebomna, Běngbe Bětsábentšana, chě canýsěfta espíritěngbentšana y Jesucristbentšana. Běngbe Bětsá, chě mora endmėná, enjamná y sempre echantsemná; chě canýsěfta espíritěnga, chabe uámana

puesto natsanoica mondmënënga; <sup>5-6</sup> y Jesucristo, chë ntšamo Bëngbe Bëtsabiana yotatsëmbcá ndegombre oyebuambnayá, chë natsaná ndabiana Bëngbe Bëtsá tojama obanënguentšana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservénama. ¡Nÿetscanga nÿets tempo chamotsinÿanÿná Cristo puerta bëtsá y uamaná bëtsemnama y obenana nÿetsca tescama yobomnama! Chca chaotsemna.

<sup>7</sup> Mouenënga. Cristo jantšetëshënguñe echanjésabo.

Chábioye nÿetscanga mochanjinÿe,  
chë tmonjancrucificágnaca;  
y quem luarentša nÿetsca entšanga puerta  
ngménaca mochántsemna  
y mochantsošachna chábeyeca.  
Ndegombre, chca chaotsemna.

<sup>8</sup> “Atše sëndmëna chë nÿetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nÿets tempo echantsemná, chë nÿets obenana bomná.

*Juan mo otjenayoquëcá Cristbiana tojáninÿe*

<sup>9</sup> Atše Juan, Jesucrístbeyeca tšëngaftangbe catšata, cháftaca cánÿiñe mo canÿacá bëtsemnama, cach tšëngaftangcá sëndëpadecena, tšëngaftangcá chanjéftsashjache Bëngbe Bëtsabe amëndayoye

jamashënguama, y tsëngaftangcá Bëngbe Bëtsábeñe jtsobátmanëse, uantado sëndmëna chë padecena soyënguifne. Bëngbe Bëtsabe palabra sënjanabuayiynama y Jesusbiana ntšamo ndegombre endmëncá sënjanóyebuambnama, atše šmonjetsanëtšena mar béjayoca canye fshantsentše, Patmos ca uabáinoca. <sup>10</sup> Y tonjanopasá, canye tmengo, chë ošbuáchiyënga Bëngbe Utabnábioye cányiñe jëtschuayama te, atše sënjanoquedá chë Uámana Espíritbeyeca corente mandaná, mo otjenayoquécá soyënga sënjëtsonyaye, y atšbe stëtšoica canye jabuache oyebuambnayana sënjanuena, mo canye trompetëfjua cuafjuajatëtcá; <sup>11</sup> mëntšá šontsanatsëtsná: “Canye librëšañe mábema lempe ntšamo contsonyacá y cochjuíchmua chë Asia luaroca canyësëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

<sup>12</sup> Sënjanobuértana jinýama nda chca šojtsanatsëtsná, y chca sënjanma ora, sënjáninýe canyësëfta castellano candelerëšënga; <sup>13</sup> y chë canyësëfta castellano candelerëšënguifne tsëntsaca canya sënjáninýe, mo entšacá inýná, canye bën entšayá uichëtjoná, y cochóntscoca canye tëntša castellano uasnanëjaca. <sup>14</sup> Chabe stjënashana uafjantsësha, puerte uafjantsësha mo canye oveshabe boboshëshacá, y chabe fšnëbenga mo iñeshcá enjëtsinýna. <sup>15</sup> Chabe shecuatšënga enjëtsebuashinýinýana mo bronscá, ndaybé natsana iñëjana tcojuchnëngo enabé chaotsemnama y chentšana entšëjuaca becá

tcojajojó corente chaotsebuashinÿinÿanama; y chabe oyebuambnayana jabuache enjétsenana mo bētsá bėjaye cuaftsebuachquēcjaná. <sup>16</sup> Chabe catšbioica cucuatšiče enjétsatbēna canÿsēfta estrellēnga, y chabe uayoicana enjétsobocana canÿe espadēja, nÿets utoicajana puerte efšánēja, y chabe jubiá tša enjétsesebuashinÿinÿana, mo chē shinÿe corente, lempe ntšamo tojobenacá tojtsebuashinÿinÿana orcá.

<sup>17</sup> Cha sēnjáninÿe ora, chabe shecuatšentše mo obanacá sēnjánshajaye. Pero cha, chabe catšbioica cucuatše átšbeñe jajájuase, šonjaniana: “Ndoñe matauatjana; atše sēndmēna chē nÿetsca soyēnga bojatšayá y pochocayá, <sup>18</sup> chē sempre vida bomná. Atše obaná sēnjamna, pero mora nÿetsca tescama vida sēntsebomna. Atše obenana sēndbomna, y chē obenánaca entšángbioye ndoñe quenátamna infiernoca nÿetsca tescama castigánēnga jtsemnana, mo nÿets tempo cuaftsobancá. <sup>19</sup> Ntšamo tconjinÿcá mábema, chē quem tempo endmēna soyēngama y chē más chcoye echántsemna soyēngama. <sup>20</sup> Mēntšá endmēna chē atšbe catšbioica cucuatšiče tconjinÿe canÿsēfta estrellēngaca y chē canÿsēfta castellano candelerēšēngaca: chē canÿsēfta estrellēnga montsinÿinÿná chē canÿsēftañe ošbuachiyēngcá enefjuanēngbeñe chamotsemándama uámana ichmónēnga, y chē canÿsēfta candelerēšēngna chē canÿsēftañe ošbuachiyēngcá enefjuanēnga.”

## 2

*Efesoca*

*ošbuachiyēngcá*

*enefjuanēnga*

*jábuayenama*

<sup>1</sup> Měntsánaca cha šonjaniyana:

“Měntsá mabobema chë Efesoca  
ošbuachiyëngcá enefjuanëngbeñe chaot-  
semándama uámana ichmonábioye:

Měntsá entsichamo chë chabe catsbioica  
cucuatsiñe canýsëfta estrellënga entsatbëná  
y chë canýsëfta castellano candelersënga  
luarëjana entsaná: <sup>2</sup> Atše lempe sëndëtatšëmbo  
ntšamo tšëngaftanga šmoyenana; atše  
corente sëndëtatšëmbo tšëngaftanga jabuache  
šmotrabájama, y ntšamo tšëngaftanga Bëngbe  
Bëtsábeñe jtsobátmanëse šmnëtsauantana  
padecena soyënguiñe šmojtsemna ora. Y  
átšnaca sëndëtatšëmbo tšëngaftanga ndoñe  
šmontsobena jtsëuantánana ntšamo bacna  
entsanga tmojtsamcá. Atšnaca sëndëtatšëmbo  
tšëngaftanga yejuana šmojarrepará y becá  
šmojenojuabó jinýama chë Jesucristbe  
ichmónënga imonna ca tmojtsichamëngbiana;  
pero ndegombre chënga ndoñe chca  
quemátsmëna; y chca šmojámayeca, tšëngaftanga  
mora šmontsetátšëmbo chënga bosterënga  
imonnama. <sup>3</sup> Padecena soyënguiñe becá  
šmojoboyá y chca ora, Bëngbe Bëtsábeñe  
šmobátmana. Chë soyënguiñe šmojasufrí,  
tšëngaftanga atše šmoservënana; y tšëngaftanga  
chca šmondëserveda, ainaniñe añemo  
jtsebomnana ntjajbanacá.

<sup>4</sup> Pero canýe soye sëntsebomna tšëngaftangbe  
contra jayanama: Tšëngaftanga mora ya  
ndoñe cachca bonshánana quešmátsbomna ni  
atšbiana ni nyëtsca entsangbiana, ntšamo

átšbeñe jtsošbuáchiyama šmonjanbojatšé orcá. <sup>5</sup> Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatšé orcá. Ndoñe chc case, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentšana cuaftsejuanacá. Chca chanjama, tšëngaftanga juabnayana ndoñe chašmonjatroc case. <sup>6</sup> Pero tšëngaftangbe pavor quem tšabe soye šmontse bomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentšana tšabá chamojábocana mo ayëñjanayëngcá, chëngbiama chanjama chë nyetsca tescama yomna tšabe vida chamotse bomnama, y chca chënga mochántsemna mo chë nyetsca tescama yomna tšabe vida jtse bomnama betiyeshentšana cuafsesacá, chë entšanga sempre oyejuayënga mondbetsemnoca ca” —cha šonjaniyana.

*Esmirnoca ošbuachiyëngcá enefjuanënga jábuayenama*

<sup>8</sup> Mëntsánaca cha šonjaniyana: “Esmirna bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntšá entsichamo chë nyetsca soyënga bojatšayá y pochocayá, chë tonjanobaná y ndabiamá Bëngbe Bëtsá tonjama cháuatayenama: <sup>9</sup> Atše sëndétatsëmbo tšëngaftanga tša jabuache šmojasufrima y ndbomnëjémënga šmomnana, pero ndegombre Bëngbe Bëtsábiocana bëtscá tšabe soyënga šmondëtsóbomñe. Y sëndétatsëmbo tša bacá tšëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entsangcá; chca, chënga mondmëna mo Satanasbe entsangcá, nyë chábioye jtseservénëse y jtsatschuanayëse.

<sup>10</sup> Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínÿënga chacmëtámiana, jinÿama ntsachetšá Crístbeñe ošbuáchiyana šmobomnana, padecena soyënguiñe šmojtsemna ora; y entsamna baseftayté jasúfriana. Sempre bëtscá ošbuáchiyana, y ainaniñe bëts añemo šmochtsebomna, masque jobanámnaca chacmotsamna, Crístbiana trabájaye causa. Chca chašmojtsamëse, atše chanjama tšëngaftanga chašmotsebomnana mo canÿe uacanana soycá, chë nyetsca tescama yomna tšabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentsana tšabá chamojábocana mo ayënjanayëngcá, ndegombre chënga ndoñe

queochátamna játauatjana nyetsca tescama castigánenga jatsmënama ca” —cha šonjaniyana.

*Pérgamoca ošbuachiyëngcá enefjuanënga jábuayenama*

<sup>12</sup> Mëntšánaca cha šonjaniyana: “Pérgamo bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyets utoicajana puerte efsana espadëja entsatbëná: <sup>13</sup> Atše sëndétatšëmbo ntšamo yomna tšëngaftangbe oyenentše, canye luare ndayentše Satanás entšángbioye puerte iuamënda. Masque chca, tšëngaftanga sempre nye atše šmondétseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiamana ndegombre oyebuambnayá, inyënga tmonjanóba ora. Y lempe chca tojopasá tšëngaftangbe pueblentse, ndayentše Satanás bëtscá entsana.

<sup>14</sup> Pero básefta soyënga sëntsebomna tšëngaftangbe contra jayanama: Chentše tšëngaftangbeñe báseftanga montsemna, soyënga montsabatambá ntšamo bayté entsemna Balaam enjanabatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë inyënga diosënga yojamna ca imojanajuabná soyënga jadórama uátšëmbona saná chë Israeloca entšanga chamosama,



y shembása o boyabásaftaca bacna soyënga chamotsamama. <sup>15</sup> Chéntsñaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. <sup>16</sup> Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndoñese, atše betesco tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjétsja chë atšbe uayoicana endóbocana espadějaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtsá tempo entšángbioye ndoñe tonjinÿanyé; y canÿe fjantse ndëtsëtema chanjáyentsbuachiye, chënga oyejuayënga šmojábemama. Chiñe canÿe tsëm uabaina echantsábemana; ndocná chë uabaina quenátabuatma, ndayá nÿe chë chamojóyëngacñënga ca” —cha šonjaniyana.

*Tiatiroca ošbuachiyëngcá enefjuanënga jábuayenama*

<sup>18</sup> Mëntsánaca cha šonjaniyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntšá entsichamo Běngbe Bětsabe Uaquiñá, chě mo iñeshcá uafšná y mo entsějuaca jojona puerte chaotsebuashinÿinÿanama bronce shecuatšěnga bomná: <sup>19</sup> Atše sěndětatsěmbo ntšamo tšěngaftanga šmoyenama; sěndětatsěmbo ntsachetšá tšěngaftanga Běngbe Bětsábioye y nÿetscángbioye šmababuánÿeshanama, ntšamo tšěngaftanga Běngbe Bětsábeñe puerte šmošbuáchema, ntšamo chábioye šmoservénama, ntšamo tšěngaftanga ínÿenga šmojujabuache y ntšamo Běngbe Bětsábeñe jtsobátmaněse becá šmojoboyá padecena soyěnguiñe; y sěntsetatsěmbo mora más bětscá tšabe soyěnga šmojtsama, ntšamo tšěngaftanga átšbeñe jtsošbuáchiyama šmonjanbojatsě orscama.

<sup>20</sup> Pero canÿe soye sěntsebomna tšěngaftangbe contra jayanama: Tšěngaftangbeñe šmonděuantana chě shembása, mo chě bacna reiná Jezabelcá endmėnábioye. Chě shembása entsichamo Běngbe Bětsabe juabna oyebuambnayá canmėna ca; pero chabe buatėmbana soyěngaca atšbe oservėnėnga entsaíngña, shembása o boyabásaftaca bacna soyěnga chėnga chamotsamama, y chě ínÿenga diosėnga yojamna ca imojanajuabná soyěnga jadórama uátšėmbona saná chamosama. <sup>21</sup> Cha sėnjuená atše chjacastíga ca, chca juabnayana ndoñe tonjatrocasa, y canÿe boyabásaftaca bacna soyěnga amana ndoñe tontsajbanase. Cha jacastígama batšá sėnjobatma, nderado chca amana nanjatróca, pero ndoñe chenátšbošena. <sup>22</sup> Mora atše chanjama bětš šocana cha

chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmonsajbanase, chëngbiana chanjama puerte chamosufrima; <sup>23</sup> y chë shembásabe básenga chantsëbaye. Chca, nyetsquénache ošbuachiyëngcá enefjuanënga mochántsetatsëmbo, ndayá entsanga juabniñe y ainaniñe tmojuabnacá atše tsuábuatmama; y cada ona tsëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tsëngaftangbentše, ínÿenga Tiatira pueblentše šmojtsemnënga, chë shembásabe बातëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tsëngaftanga ndoñe quebochatamënda inÿe más toto soye chašmotsamama. <sup>25</sup> Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentsana tsabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nÿetsca mándayëngbentša entsángbeñe jtsemándayama, <sup>27</sup> ntšamo atšbe Taitá chabe obenana šojatšetacá; y chënga entsángbioye puerte obenánaca mochántsamëndaye, mo

canÿe hierro varëfjaquëcá, y chëngbe contra chamojtsemnëngbioye mochántsapochocaye, mo nÿe matbajënga tmojtsëtsjanjncá. <sup>28</sup> Y chë jabínÿnama ora bínÿnaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

*Sardisoca ošbuachiyëngcá enefjuanënga jábuayenama*

<sup>1</sup> Mëntsánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiamá ínÿenga tša jtsichámuana Bëngbe Bëtsá jasérviamá bëtscá šmojtsama ca, pero ndegombre tšëngaftanga nÿe batšatema šmontsama, y chca, chabiamá mo obanëngcá šmondmëna. <sup>2</sup> Botamana šmochjenóbobonÿe y más šmochtsama chë Bëngbe Bëtsá jasérviamá cabá šmondama básefta soyënga. Ndoñe yapa quenatájamna chë tšabe soyëngnaca chašmotsajbanama, er atše sënjinÿe chë Bëngbe Bëtsábioye jasérviamá ntšamo jtsamëse šmoyencá, atšbe Bëtsabiamá ndoñe yapa tšabá

quenátsmëna. <sup>3</sup> Asna, šmochtsenójuabnaye ndayá Bëngbe Bëtsábiocana šmojóyëngacñama, y chabiamá šmojouena soyënguíñnaca. Ntsamo chë soyënga yomncá šmochtsiyena, juabnayana šmochjatróca y šmochjóntša bëtscá jtsamana Bëngbe Bëtsá jaserviama. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocace, nÿe ndeolpe chanjá tšëngaftangbioye, mo canÿe atbëbanacá, chabiamá ndocná tontsejuabná ora, y ndegombre tšëngaftanga ndoñe quešmochátstatsëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entšanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántšajna uafjantsëjuangá uichëtjonënga, chënga chca mercedo montsebuajónayeca. <sup>5</sup> Chë padecena soyënguentšana tšabá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónÿenëngbe uabaina enduábemana librëšentsana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá ca” —cha šonjaniyana.

*Filadelfioca ošbuachiyëngcá enefjuanënga*

*jábuayenama*

<sup>7</sup> Měntšánaca cha šonjaniana: “Filadelfia bēts puebloca ošbuachiyěngcá enefjuaněngbeñe chaotsemándama uámána ichmonábioynaca mēntšá mabobema:

Měntšá entsichamo chē uamaná y ndegombre oyebuambnayá, chē jtsemándayama puerte obenana bomná, ntšamo Rey David enjanbomncá, chē nda ndayá chaotsemnama tojamandá ora, ndocná ntsoobenana jamama chca ndoñe chaondětsemnama, y ndayá ndoñe chaondětsemnama tojamandá ora, ndocná ntsoobenana jamama aíñe chaotsemnama: <sup>8</sup> Atše lempe sěndětatsěmbo ntšamo tšěngaftanga šmoyenama. Minyěnga, atše sěnjama tšěngaftanga bētscá tšabe soyěnga chašmotsebomnama, y ndocná quenátobena jamama chca ndoñe chaondětsemnama; y chca entsemna mo atše tšěngaftangbiana canyē bēsáša cuafjatěfjá, y chěša jtatámiana ndocná quenátobena. Atše sěndětatsěmbo tšěngaftanga batšatema obenana šmobomnama, pero šmojouena ntšamo jtsamama tčbonjauyancá, y ndocna te chešmátayana atšbe entšanga ndoñe šmondměna ca. <sup>9</sup> Atše chanjama, chē mo Satanasbe entšangcá imomněnga, nye chábioye jtseservéněse y jtsatschuanayěse, chē judiěnga imomna ca icháměnga, pero chē Běngbe Bětsabe bocacana entšangcá ndáměnga y bosterěnga, chěnga tšěngaftangbioye chamua y tšěngaftangbe delante chamoshamentšé, tšěngaftangbiana respeto jinyanjyama, y chca, chěnga chamotsetátšěmbo atše sempre

cbababuánÿeshanama. <sup>10</sup> Atše tcbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguiñe, y tšëngaftanga chca šmonjama. Chíyeca, atše puerte tšabá cbochántsanÿena, chë quem luarentše oyenënga nÿetscanga jasúfriama y padecena soyënguiñe jtsemnama chaojtsemna ora, Bëngbe Bëtsábeñe aíñe o ndoñe mondošbuáchema jinÿanÿiyama.

<sup>11</sup> Cachiñe quem luaroye betsco chanjésabo. Sempre šmochtsama ntšamo mora šmondamcá, y Bëngbe Bëtsábiocana šmojóyëngacñe soyënga šmochtsinÿena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtseservénama ndoñe tmontsajbanángbioye yochjatšataycá, chëngbe uacanana soye. <sup>12</sup> Chë padecena soyënguentsana tšabá chamojábocana mo ayënjanayëngcá, chëngbiamá atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábiocana. Y chëngbeñnaca chanjuábema atšbe tsëm uabaina. Lempe chca chanjama jinÿanÿiyama chënga Bëngbe Bëtsábenga mochtsemnama.

<sup>13</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

*Laodiceoca ošbuachiyëngcá enefjuanënga jábuayenama*

<sup>14</sup> Mëntšánaca cha šonjaniyana: “Laodicea bëts pueblocá ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá: <sup>15</sup> Atše lempe sëndëtatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jaserviama, pero Bëngbe Bëtsabe buayenana soyënga ndoñe lempe šmontsabeté. Y chca, nýe batšatema šmojtseboše Bëngbe Bëtsá jaserviama; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye! <sup>16</sup> Chca, tšëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmontsabeté. Chíyeca atše sëntsejuabná jtsëbatena, mo nda tibiye búyeshe tojëtsbuashëtjácá, chcaye ndoñe bondogustana causa.

<sup>17</sup> Er tšëngaftanga jtsichámuana bomnënga šmomna ca, puerte tšabá šmojábocana



y tondaye cmontsabuáshebená ca, pero ndoñe quešmátstatsēmbo Bēngbe Bētsabe soyēnga bētscá cmojtsabuáshebenama. Chca, tšēngaftanga šmontsemna nŷa ndoñe tšabá, ínŷenga ngmēnana chacmotsabamna, mo ndbomnjēmēngcá, mo jtanēngcá, Bēngbe Bētsabe soyēngama ntsosertancá, y mo enašēngcá, bētscá Bēngbe Bētsabe soyēnga ntsebomncá. <sup>18</sup> Chíyeca cbabuayená, átšbentšana chašmuatsjinŷe chē Bēngbe Bētsabe soyēnga y uámana soyēnga, mo chē ena castellano jabemama, iñējana fjēchnēnguēse castellano átšbioye šmojtsontšabuamnañcá. Tšēngaftanga Bēngbe Bētsabe delante mo enašēngcá šmondmēna, er cha endonŷá chē ba bacna soyēnga ntšamo tšēngaftanga šmojtsamcá. Smochjaleséncia atše chachbējabuache tšēngaftanga Bēngbe Bētsabe bominŷiñe tšábenga chašmotsemnama, mo juichētjuama uafjantse entsayá átšbioye šmojtsantšabuamnañcá. Chca šmochjama, tšēngaftanga Bēngbe Bētsabe delante ndoñe chašmondētsēuatjama. Smochjaleséncia atše chachbējabuache tšēngaftanga Bēngbe Bētsabe soyēngama chacmósertama, mo tšēngaftanga bominŷe šocanama shnana átšbioye šmojtsontšabuamnañcá. Chca šmochjama, Bēngbe Bētsabe soyēngama puerte tšabá chacmósertama.

<sup>19</sup> Atše chē sēndábabuanŷeshanēnga sēndbaucácana y sēndbábuayenaye. Chíyeca, lempe ntšamo šmojobenacá šmochtsama Bēngbe Bētsá jaserviama, y juabnayana šmochjatróca, y nŷets tempo puerte šmochtseboše Bēngbe Bētsá

jtseservénana. <sup>20</sup> Nderado canye tšabe amigo yebnoye tojabo y tojachembo, tšengaftanga šmojouenëse y bësása šmojebiatëfjëse, cha jamashënguana, y cányiñe cháftaca joyejuayana y jasana. Cachcá, atše entšanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca cányiñe mo canyáca chanjëftsemna.

<sup>21</sup> Chë padecena soyënguentsana tšabá chamojábocana mo ayënjanyëngcá, atše chanjama chënga puerte bësëtsanga chamotsemnama ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayënjnacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá” —cha šonjaniana.

## 4

*Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquécá sënjáninye. Sënjanrrepará y sënjáninye celoca canye bësása enjëtsatëfjna, y chë natsana sënjanuena oyebuambnayana, chë enjamna mo canye trompetëfjua cuafjuajatëtcá, mëntsá šonjëtsatsaye: “Moye másëngo, atše cbochanjinýinýiye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninÿe celoca enjétsemna canÿe reybe uámana puesto, y chentše canÿa enjétsetbemana. <sup>3</sup> Chentše enjésetbemaná enjamna, puerte tëshinÿná mo jaspe ndëtšbecá, puerte buanganá mo cornalina ndëtšbecá, y chë uámana puesto shëconana canÿe tsëfcuácuatjo enjamna, y enjétsebuashinÿinÿana mo canÿe esmeralda ndëtšbecá. <sup>4</sup> Chë reybe uámana puesto juachajana, inÿe uta bnëtsana y canta puesto sënjáninÿe, y chiñe uta bnëtsana y canta bëtsëjémënga amëndayënga monjésetbiamana, uafjantsëjuangá uichëtjonënga, y castellano coronëshangá monjétsabestšajona. <sup>5</sup> Chë uámana puententšana enjétsobocana tcuinÿëjënga, becá shauenanana y juesasanana; y chë uámana tbemaniñentša natsanoicna, canÿsëfta uajuinÿanëshha enjétsangbototjuana; chë uajuinÿanëshangá entsayana chë Bëngbe Bëtsabe canÿsëfta espíritënga. <sup>6</sup> Y chë uámana puententša natsanoica enjétsemna mo canÿe mar bejaycá, tëshínÿniye mo canÿe cristal ca uabaina ndëtšbecá.

Chë luariñe tsëntsaca, chë uámana puesto enjétsemnentše y chë shëconánëjana monjétsemna canta Ainënga, nÿétsañe fšnëbéngaca, natsanoica y stëtšoica. <sup>7</sup> Chë natsana Ainá enjamna mo canÿe leoncá, chë inÿe Ainá mo canÿe torošcá, chë inÿe Ainá enjánbomna mo canÿe entšabe jubiácá, y chë inÿe Ainá mo canÿe águila tojtsongüefjnacá. <sup>8</sup> Chë canta Ainënga, cada ona chnënguana juatëngmiášha enjanábomna, y tsoicajana y shjoicajana nÿétsañe fšnëbënga

monjánbomna. Y chënga nÿets tempo, ntjochnacá mëntśá monjánichamo:

¡Uamaná, Uamaná, Uamaná, Bëngbe Utabná,  
Bëngbe Bëtsá nÿets obenana bomná,  
nda enjamná, endmëná y sempre echanjëftsemná  
ca!

<sup>9-10</sup> Chca chë Ainënga Bëngbe Bëtsá bëtscă tmontanchuá, Bëngbe Bëtsá chë uámana puestentše tbemaná, chë nÿets tempo y nÿetsca tescama oyená. Chënga puerte respeto chabiamama monjëtsebomna y bëtscă tmontanchuá. Cada ora chënga chca tmonjanma ora, chë uta bnëtsana y canta bëtsëjémënga amëndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntśá jtsichámuana:

<sup>11</sup> Aca nÿets merecido condëtsobuájoñe, Bëngbe Utabná y Bëngbe Bëtsá, entšanga chamotsinÿanÿnama, aca puerte bëtsá comnama, y chamotsichamo aca nÿets respeto buajoná comna, y nÿets obenana bomná comna ca, er aca nÿetsca soyënga tcojama; aca icnabóseyeca chë soyënga yojtsemna y aca chca tcojanma ca.

## 5

*Chë uabemana uándmanana tsbuanácha y chë Oveshatema*

<sup>1</sup> Chë uámana puestentše enjetsetbemanabe catšbioica cucuatšinë canÿe uándmanana tsbuanáchanaca sënjáninÿe, y nÿétsañe

enjétsabemana tsoicajana y shjoicajana, y canýsëfta tsengájase sellëngaca enjétsajandmanana. <sup>2</sup> Y canýe ángel puerte obenana bomná sënjáninýe, y cha mëntśá enjétsayebuache: “¿Nda merecido yobuájona, quem uándmanana tsbuanácha jutéfjonama y chë sellënga jutsécama ca?”

<sup>3</sup> Pero, ni celoca, ni quem luarentşe, ni quem luarentşa jashenoye, ndocná quenjatsmëna obenánaca chë uándmanana tsbuanácha jutéfjonama, ni juinýama. <sup>4</sup> Y atşe puerte sënjánenoboşachna, er ndocná ntjónýnana merecido buajoná chë uándmanana tsbuanácha chautéfjonama, ni chauinýama. <sup>5</sup> Pero canýa chë bëtsëjemënguentsá şonjanaryana: “Ndoñe más matenóboşachena; mouena, chë Judabe pamillentśá, León ca uabobainá, mando y obenana bëtsebomnama, chë rey Davídbentşana Entśá, tonjayëjaná; cha entsobena chë uándmanana tsbuanácha jutéfjonama, y chë canýsëfta sellënga jutsécama ca.”

<sup>6</sup> Chora sënjáninýe, chë uámana puesto y chë canta Ainënga y chë bëtsëjemëngbe tsëntsaca, canýe Oveshatema tsanana, pero enjétsinýna mo cuaftsobacá. Chë Oveshatema enjánbomna canýsëfta tsëtjonëşe y canýsëfta fşnëbé. Chë canýsëfta fşnëbé monjaninýinýná chë Bëngbe Bëtsabe canýsëfta espíritënga, chë Bëngbe Bëtsá nyets quem luarëjana tojánichamonga. <sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentşe tbemanabe catşbioica cucuatşentşana; <sup>8</sup> y chabe cucuatşinë tonjanaca ora, chë canta Ainënga y chë uta bnëtsana y canta

bëtsëjémënga amëndayënga chë Oveshatembe shecuatšentše tmonjanoshamentšé. Nÿetscanga monjétsëtbëna arpangá y castellano codbenga jútjena inciensiýeca; chë codbenga inciensiýeca enjamna chë Bëngbe Bëtsabe entšanga tmojayana palabrénga, cháftaca jencuéntama ora. <sup>9</sup> Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsëcama;

er acbe buiñe juabuáshanëse tconjanóbana, y chca enjamna mo crocénana cuafjëtsajocá, Bëngbe Bëtsabiana chamotsemnana, entšanga nÿetsca cachca buiñe bomnënguentshana, nÿetsca biyana bomnënguentshana, nÿetsca canÿe entšanguentshana, y nÿetsca mándayëngbentša entšanguentshana.

<sup>10</sup> Aca tcojama chënga chamotsobena ácaftaca jtsemándayama

y uámanënga chamotsemnana, Bëngbe Bëtsábioye mo bachnangcá chamotseservénama, y quem luarentše chënga montsemánda ca — chënga monjëtseversiaye.

<sup>11</sup> Y chca sënjëtsonÿaye ora, mallajta angelëngbe oyebuambnayana sënjanuena, y chënga monjëtsemna chë uámana puestentše, chë Ainënga y chë bëtsëjémënga amëndayëngbe shëconana. Nÿetsá bëtscá angelënga monjëtsemna, corente mallajta; <sup>12</sup> y chënga mëntsá monjëtseyebuache: ¡Chë Oveshatema cuafjobacá endmëná, merecido endëtsobuájoñe, nÿets obenana, nÿets bomnana, nÿets osertánana y nÿets añemo chaotsebomnana,

y entšanga chabiamama chamotsichamo cha nÿets  
 respeto buajoná yomna ca,  
 y chamotsinÿanÿnama cha puerte bëtsá y uamaná  
 yomnama,  
 y nÿetscanga chamotsatschuanama ca! —chënga  
 monjétsayebuache.

<sup>13</sup> Y sënjanuena, lempe ntšamo Bëngbe Bëtsá to-  
 janmcá aina soyënga, celoca, quem luarentše,  
 quem luarentša jashenoye y chë mar béjayoca,  
 chëngnaca mëntšá monjétsichamo:

¡Chë uámana puestentše tbemanábioye y chë Ove-  
 shatema nÿetscanga nÿets tempo y nÿetsca  
 tescama chamótsatacheuanaye  
 y chamotsichamo chata puerte uámanata y nÿets  
 respeto buajonata ibomna ca,  
 y chamotsinÿanÿná chata puerte bëtsétsata y obe-  
 nata bëtsemnama ca!

<sup>14</sup> Y chë canta Ainëngna monjétsichamo:  
 “Chca chaotsemna ca.” Y chë bëtsëjémënga  
 amëndayëngna tmonjanoshamentšé y chátbioye  
 monjétsatacheuanaye.

## 6

*Chë Oveshatema chë canÿsëfta sellënga  
 tonjanëtsécá*

<sup>1</sup> Chentšana más sënjáninÿe; chë Oveshatema  
 chë canÿsëftentšana natsana sello tonjanëtsécá  
 ora, sënjanuena canÿa chë canta Ainënguentšana  
 puerte jabuache, mo cuafjajuesascá, mëntšá  
 enjétsichamo: “¡Mabo ca!” <sup>2</sup> Sënjanrrepará y  
 sënjáninÿe canÿe fjantse couaye, y chábeñe  
 enjetsenjaquená canÿe arquëja enjétsatbëna.  
 Chábioye canÿe coronësha tmonjaniyé, y mo

canÿe ayënjanayacá tonjëftsanbocna, y cabá más jatsyënjanámnaca.

<sup>3</sup> Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentšana mëntšá enjëtsichamo: “¡Mabo ca!” <sup>4</sup> Y inÿe couaye tonjánbocna, canÿe buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entšanga chamotsenóbama; y canÿe bëts espadëja tmonjanoyé.

<sup>5</sup> Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentšana mëntšá enjëtsichamo: “¡Mabo ca!” Sënjanontješé y canÿe ftsenga couaye sënjáninÿe, y chë enjetsenjaquená canÿe romanëša enjëtsëtbëna. <sup>6</sup> Y chë canta Ainëngbeñe canÿe oyebuambnayana mëntšá sënjanuena: “Nÿe canÿe kilo trigo canÿe tesca trabajuama, y unga kilo cebadá canÿe tesca trabajuama; pero chë aceitiye y chë vínoyna ndoñe cattsepochócase ca.”

<sup>7</sup> Chë Oveshatema chë inÿe sello tonjanëtsécá ora, chë ústonoca Ainá enjëtsichamo: “¡Mabo ca!” <sup>8</sup> Sënjanontješé y canÿe shatsësiye couaye sënjáninÿe; chë enjetsenjaquená Obanana ca enjanabaina, y stëtsoica bonjëtsëstona canÿa, Obanënga imomna luare ca uabainá; y chátbioye obenana tmonjanatsatá cántañentsana cánÿentše quem luarentše jtsepochócase, chentša entšanga jtsapochócase, entšanga tmojtsentsjanama, bëts shëntsänëngaca, šocanëngaca y quem luarentša tsátjaye bayëngaca.

<sup>9</sup> Chë inÿe sello tonjanëtsécá ora, sënjáninÿe



chë altarentša tajsoye chë tmojanóbanëngbe espíritënga, chë Bëngbe Bëtsabe palabra entsãnga abuayiynayama tmojanóbanënga. <sup>10</sup> Chora chënga tmonjanontsé tša uayebuáchana: “Uamaná y ntšamo tojašebuachenacá lempe amá bëngbe Nduño, ¿ntseco quem luarentša entsangbiana cochjayana ndoñe tšabá tmonjamama, y chë bëngbioye obanayama cochjácastigaye ca?” <sup>11</sup> Chentsana nÿetscángbioye uafjantse entsáyá tmonjaniyé y tmonjanéyana batšatema más chamobatmá ca, chë cachëngcá Crístbeyeca catšátanga y oservénënga, chë cachëngcá mochjanóbanënga, nÿetscanga choca chamojtsemnëntscuana.

<sup>12</sup> Y más sënjáninÿe; chë inÿe sello cha tonjanëtsëcá ora, jabuache fshantse tontsanangmëmëmana; shinÿe tontsanftsénganga, mo chë obaná tojtsemnama juichëtjuama entsáyacá, y nÿets juashcona mo buiñcá enjétsinÿna, <sup>13</sup> y estrellatémënga celocana fshantsoye tontsantquécjana, mo canÿe higo betiye jabuache bínÿiaca tojtseshatíeyna ora, chë nguëfshna higuëbenga cuafjatquécjancá. <sup>14</sup> Y celoca luare tontsanenatjëmëba mo canÿe tsbuanácha cuafjuandmanacá, y nÿetsca tjañe y béjayoca fshantsënga, chë ndayentše enjamnentšana tontsanojuaná; <sup>15</sup> y nÿetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nÿetscanga chë nÿets tempo nÿe ínÿabiana oservénënga y chë cachëngbiana trabájayëngnaca, chë cuevëshënguiñe y bëts ndëtsbenguenache

tjañe tmontsanóitana; <sup>16</sup> y chë tjañengoye y chë ndëtsbengoye montsanichamo: “¡Bëngbioye šmotsëtebuantsá y šmotsaitame, chë uámana puestentše tbemanabe bominyëntšana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama! <sup>17</sup> Er chë uachuana te chabe castigo jtsebínýnama te tojóshjango; y mora ¿nda nanjobenaye chë sóyeca ndoñe chamondëtsepochochocama ca?” —chënga montsanichamo.

## 7

### *Chë Bëngbe Bëtsábioye oservénënga chë uabouana castigüentsana mochántsatsebacana*

<sup>1</sup> Chca tonjanopasá chentšana, canta angelënga sënjánanyë, monjétsatsana chë quem luarentša canta opochócayenache; chënga ndoñe quemënjatanleséncia chë canta binýiënga jtsebínýnama, ndoñe chaondëtsebinýiyama, ni fshantsentše, ni mar béjayoca, ni ndocna betiyeshënguiñe. <sup>2</sup> Inýe ángelnaca sënjáninýe, shinýe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inýe canta angelëngbioye, ndëmuanýengbioye obenana tmojanatšatá chë fshantsentše y mar béjayoca lempe jtsepochochocama, chëngbioye jabuache tonjánabachembo: <sup>3</sup> “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiamama oservénëngbioye chë sélloca juentsaca fchayauínýnanantscuana, ndoñe chamondëtsepochochocama ca!”

4 Y sēnjanuena buétanga chē sélloca tmojánauinñanayama: canye patse, canta bnétsana y canta uaranga entsanga uinñananénga nýetsca Israeloquentša bēts pamíllanguentšana.

5 Judabe pamillentšana, bnétsana uta uaranga uinñananénga;

Rubenbe pamillentšana, bnétsana uta uaranga;

Gadbe pamillentšana, bnétsana uta uaranga;

6 Aserbe pamillentšana, bnétsana uta uaranga;

Neftalibe pamillentšana, bnétsana uta uaranga;

Manasesbe pamillentšana, bnétsana uta uaranga;

7 Simeonbe pamillentšana, bnétsana uta uaranga;

Levibe pamillentšana, bnétsana uta uaranga;

Isacarbe pamillentšana, bnétsana uta uaranga;

8 Zabulonbe pamillentšana, bnétsana uta uaranga;

Josebe pamillentšana, bnétsana uta uaranga;

y Benjaminbe pamillentšana, bnétsana uta uaranga entsanga.

*Chē mallajta entsanga uafjantsējuangá uichétjonénga*

9 Chentšana, sēnjanrrepará y mallajta entsanga sēnjánanýe, ndocná quentaisobenaye jacúntana, nýetsca mándayēnguentsana, nýetsca cachca buiñe bomnēnguentsana, nýetsca canye entsanguentsana, y nýetsca biyana bomnēnguentsana; chénga monjétsatsana chē uámana puesto chē Oveshatembe natsanentše, uafjantsējuangá uichétjonénga y ramēshangá monjétsētbēna. <sup>10</sup> Nýetscanga tša monjétsayebuache: ¡Bēnga atsebacayana endobá, Bēngbe Bētsá,

chë uámana puestentše entsetbemanábentšana,  
y chë Oveshatémbentšana ca!

<sup>11</sup> Y nýetsca angelënga, chë uámana puesto y  
chë bëtsëjémënga amëndayënga y chë canta  
ainëngbe shëconana monjétsatsanënga, chë uámana  
puestentša natsanoica tmonjanoshamentsé,  
fshantsóntscoñe jotsejbénase, y Bëngbe Bëtsá  
tmonjanadorá, <sup>12</sup> mëntsá jayanëse:

¡Chca chaotsemna!

Bëngbe Bëtsábioye nýets tempo y nýetsca tescama  
chamotsadorana  
y nýets ainánaca cha chamotsatschuaná.

Entšanga chamotsinýanýná cha puerte bëtsá y ua-  
maná bétsemnama;

cha endmëna nýets osertánana bomná, y nýets re-  
speto buajoná, y nýets obenana y añemo  
bomná.

¡Chca chaotsemna ca! —chënga monjétsichamo.

<sup>13</sup> Chentsana, canya chë bëtsëjemënguentsá  
tonjanoyebuambá y šonjantjá: “¿Ndëmuanýënga  
imomna chë uafjantsëjuangá uichëtjonënga, y  
ndëmocana tmojabo ca?”

<sup>14</sup> “Taita, aca chëngbiana cotátšëmbo ca” —atše  
sënjanjuá.

Y cha šonjaniyana: “Chënga montsemna  
chë jabuache ngmenënguentsana tšabá  
tmojábocanënga; chë Oveshatema chëngbiana  
tojóbana y chëngbe bacna soyëngama perdonánënga  
montsemna; chëngbe uichëtjonëjuangá  
tmojtsaboshabé y chë Oveshatembe buiñeca  
tmojtabofjantsé.

<sup>15</sup> Chýyeca chënga chë Bëngbe Bëtsabe uámana pues-  
tentša natsanoica montsemna,

y chábioye nyets tempo chabe delante  
mondëservena,  
y chë uámana puestentše entsetbemaná,  
chëngbenache jtsemnëse, chënga echántsanyëna,  
mo cuafjutsebotscá.

<sup>16</sup> Ya ndoñe más shëntsana, ni uajuendayana que-  
mochátsbomna;  
shinyama, ni yapa jënyama ya ndoñe más que-  
mochátssufrina;

<sup>17</sup> er chë Oveshatema, chë uámana puestentša nat-  
sana tsëntsaca entsemná,  
chëngbioye mo oveshëngcá echantsabuajënyä,  
y echanjunatse béjaye vida bomniye yóbocana lu-  
aroye,  
y Bëngbe Bëtsá echanjama ya ndoñe más  
ngménana chamondëtsebomnama ca” —  
cha šonjanjuá.

## 8

### *Chë ústonoca sello*

<sup>1</sup> Chë Oveshatema chë uándmanana  
tsbuanáchañe chë ústonoca sello tonjanëtsécá  
ora, celoca ndocá quentétsënëna mo tsëntsa hora  
nyetsá.

<sup>2</sup> Chora sënjánanyë chë canysëfta angelënga,  
chë Bëngbe Bëtsabe delante monjétsatsanënga;  
chëngbioye canysëfta trompetëfjuangá  
tmonjanijé.

<sup>3</sup> Chentšana inye ángel tonjánashjango, canye  
castellano matbëtémaca inciense jajuinÿiyama,  
y altar natsanoica tonjantsá; chábioye bëtscá  
inciense tmonjanoyé chaojuinÿema chë castellano  
altaroica, chë uámana tbemana natsanoica

enjétsemnoca. Chë ángel incienso tonjanjuinýé Bëngbe Utabná jëtschuayama, cánýiñe nyetsca chë Bëngbe Bëtsabe entsanga tmojoyebuambá palabrëngaca, cháftaca jencuéntama ora. <sup>4</sup> Y chë incienso juinýnentša ngona, chë ángelbe cucuatšentsana Bëngbe Bëtsabe delante tonjanótsjua, cánýiñe chë Bëngbe Bëtsabe entsanga cháftaca jencuéntama palabrëngaca. <sup>5</sup> Chentsana chë ángel chë incienso jajuinýiyama matbëtema tonjanca, chë altarentša chebánbengaca tonjanajutjé, y quem luaroye tonjanëtsana. Chora enjétsemna tša juesasanana, corente shauenanana, bëts cá tcuinýënga, y quem luare tontsanangmëmana.

### *Chë trompetëfjuangá*

<sup>6</sup> Chora chë canýsëfta angelënga, chë canýsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y íñeshe, cánýiñe buiñeca. Ungañentsana cánýentse quem luarentse tontsanjuinýe, úngañentsana cánýentse betiyeshënguñe y nyetsca nguëfshna shacuanënguñnaca.

<sup>8</sup> Chë inýe ángel chabe trompetëfjua tonjanájatëto, y chora chë mar béjayoye tmonjanëtsana canýe soye mo canýe bëts tjañe tojtsangbototjuancá, y chë mar béjayiñe úngañentsana cánýentse buiñe tontsanóbema. <sup>9</sup> Chë mar béjayiñe vida imobomnëngbeñe úngañentsana cánýentse tontsanopochocá, y chë barquënguëntšnaca úngañentsana cánýentse.

<sup>10</sup> Chentshana chë inye ángel chabe trompetéjua tonjanájatëto, y canye bëts estrella, mo canye uajuinÿanëshacá enjétsangbototjuana, celocana tonjanótsatše chë úngañentsana cánÿentše béjayënguiñe, y béjaye óbocanenache. <sup>11</sup> Chë estrella enjanabaina Untjana ca; y chë úngañentsana cánÿentše buyeshënguiñe untjiye tontsanóbema, y chë untja búyeshe causa ba entsanga tmonjanóbana.

<sup>12</sup> Chë inye ángel chabe trompetéjua tonjanájatëto, y chora tontsanóndbema chë úngañentsana cánÿentše shinÿiñe, y chë úngañentsana cánÿentše juashconiñe y chë estrellënguïñnaca. Chca, nÿetsca chentsa úngañentsana cánÿentše ibetiñe tonjanoquedá, y chë causa ndoñe quemëntétsebinÿnaye posufta horëntscuana, bnëté canta hora y ibeta canta hora.

<sup>13</sup> Chentsana, sënjanrrepará y sënjanuena canye águila, tsbanánoca celoca enjetsongüefjná, jabuache mëntšá enjétsichamo: “¡Tša lastema, tša lastema, tša lastema quem luarentša entsangbiama, chë inye trompetéjjuangá chë inye unga angelënga chamojuájatëto ora ca!”

## 9

<sup>1</sup> Chentsana chë inye ángel chabe trompetéjua tonjanájatëto, y sënjáninÿe canye ángel quem luaroye jastjanguana y enjétsinÿna mo canye estrella celocana quem luaroye cuafstsatsatšancá; y moye tonjánashjango ora, tmonjanoyé chë uabouana tboca atëfjñentša llavëfja. <sup>2</sup> Chë uabouana tboca atëfjñentše tonjánatëfjo, y chentsana becá ngona tonjanótsjua, mo bëts

hornentša ngoncá; y chë uabouana tboye atëfjñentše ngona causa shinÿe tontsanibétata y nÿets celoca ena ngona enjëtsemna. <sup>3</sup> Chë ngonentšana ba tšátjaye chapulinga tmonjánbocana, y nÿets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjuama alacranëngbe obenancá. <sup>4</sup> Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sëlloca nduinÿnanana entšangna aíñe. <sup>5</sup> Pero ndoñe chematanalesenciá entšángbioye jobáyana, ndayá nÿe jamama chënga shachna shinÿentscuana tsetšanana chamotsebomnama; y chë chënga monjánama chamotsebomnama tsetšanana enjamna mo canÿe alacranbe uetjoniñcá.

<sup>6</sup> Chca tempo chaojtsemna ora, entšanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmtsobencá.

<sup>7</sup> Chë tšátjaye chapulinga monjétsinÿna mo couayëngcá prontánënga jama entšángaftaca jéntsjava; chëngbe bestšašiñe monjanábomna mo castellano coronëshangacá, y chëngbe jubiá enjamna mo entšabe jubiácá. <sup>8</sup> Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá. <sup>9</sup> Chëngbe cuerpënga jenëuyanama cochaca



monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inyëngaftaca jéntsjava tmojëftsátjajo ora tojtseshauenancá. <sup>10</sup> Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjánbomna shachna shinjëntscuana entšanga mal chamotsepasama. <sup>11</sup> Chë tšátjaye chapulinga canyë amëndayá monjánbomna, chë uabouana tboça mándaye ángel; hebreo biyaña cha uabainá Abadón ca y grieguiña Apolión o pochocayá ca.

<sup>12</sup> Chë natsana pochócayana ya tocjochnëngo, pero más chcoye cabá inyë uta soye más pochócayana cachcá echántsemna.

<sup>13</sup> Chentšana chë inyë ángel chabe trompetëfjua tonjanájatëto, y canyë oyebuambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentšana enjëtsohocana.

<sup>14</sup> Y chë oyebuambnayana, chë trompetëfjua tonjanájatëto y enjëtšëtbëna ángelbioye tbonjanianyana: “Chë canta angelënga chë Eufrates bëtš fshájaye tsachoca utsbuanënga mëjafjoná ca.”

<sup>15</sup> Y chë canta angelënga tmonjanëjafjoná; y nya chë ora, chë te, chë shinjë y chë uatama chëngbioye tmojanaprontá, chë quem luarentša entšángbeñe úngañentšana cánjëntšënga jtsëbáyama. <sup>16</sup> Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

17 Měntsá sěnjánanÿe mo otjenayoquēcá chē couayēnga y chē chēngbeñe enjaquenēnga: Chē enjaquenēnga monjánbomna morocho soyēnga cochaca, jenéuyanama, y chē soye buanganana enjáninÿna, mo iñcá, y fchendana mo chē uámana ndětšbé jacintcá y tsěsiyana inÿnana mo azufrcá; y chē couayēnga monjánbomna mo leonbe bestšašcá, y chēngbe uayoicana enjétsobocana iñe, ngona y azufrana. 18 Y chē úngañentsana cánÿentše entšanga tmonjanóbana quem unga uabouana pochócaye soyēngaca, chē couayēngbe uayoicana enjétsobocanana: iñe, ngona y azufrana. 19 Er chēngbe obenana entšanga japochócama monjánbomna uayáshañe y uascuatšějuañe; er chēngbe uascuatšějua enjuamna mo mětšcuayēngcá, bestšašēngaca, y chējuanga causa entšanga mal montsanpásaye.

20 Pero chē inÿe entšanga, chē uabouana pochócaye soyēngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chē bacna soyēnga ntšamo monjanamcá; ndoñe chematanajbaná adórayana chē bacna bayējēnga, ni chē mo diosēnga cuaftsemncá jtsejuabnayēse imojánadorana castellano soyēnga, midio soyēnga, bronce soyēnga, ndětšbé y niñébé soyēnga; y chca soyēnga ndoñe quemēnjatobena ni jinÿama, ni jouenama, ni jtsanama. 21 Juabna ndoñe chematantrocá y ndoñe chematanajbaná entšanga obanayana, encjuanayana, bacna soyēnga boyabása o shembásaftaca jtsamēse oyenana, ni atbēbanana.

# 10

## *Chë ángel base uándmanana tsbuanáchaca*

<sup>1</sup> Chentšana sënjaninýe inýe ángel, puerte obenana bomná; celocana enjétsastjajuana, y chabe shéconana canýe jantsetéshe enjétsamna; chabe bestsaše tatsétsacá canýe tséfcuácuatjo. Chabe jubiá shinýcá enjétsesuashinýinýana, y chabe shecuatšenga mo úcuatjona niñébenga cuaftsoiñcá. <sup>2</sup> Chabe cucuatshiñe enjétsétbëna canýe base uándmanana y utéjña tsbuanáchaca. Chabe catšbioica shecuátšeca chë mar béjayoca tonjantsá, y chë uañicuayóicatšecna, quem fshantsentse. <sup>3</sup> Y jabuache tonjanoyó, mo canýe león cuaftseyocá; y tonjanoyó ora, canýsëfta juesasanentša jabuache shauenanana sënjanuena. <sup>4</sup> Chë canýsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canýe oyebuambnayana celocana sënjanuena, mëntšá šonjétsatsaye: “Nýe aca cochtsójuabnañe ntšamo chë canýsëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup> Chora chë ángel, chë mar béjayoca y quem fshantsentse atsaná sënjaninýá, chabe catšbioica cucuatše celoye tonjanatsbaná, <sup>6</sup> y tonjanjurá Bëngbe Bëtsabiama, chë nýets tempo y nýetsca tescama oyenabiama, chë celoca, quem luare, chë mar béjaye, y lempe chë luarënguñe yobinýncá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá,

<sup>7</sup> er chë tempo chaojóshjango, chë ústonoye ángel chabe trompetéřjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yajuabnacá; chë soye nyetsca entšángbioye cha ndoñe chenatinÿanÿé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

<sup>8</sup> Chë atše sënjanuena oyebuambnayana celocana enjëtsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšiče base uándmanana y utëřjna tsbuanácha ca.”

<sup>9</sup> As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemécha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

<sup>10</sup> As chë base uándmanana tsbuanácha chë ángelbe cucuatšentšana sënjanaca, y sëntsanásañe; y atšbe uayoye meloycá enjëtsamna, pero sënjanabmuaná y atšbe uafsbioyna puerte uauntjécha tontsanábema. <sup>11</sup> Chora šmonjaniyana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canÿe luarentša entšángaftaca, ba mándayëngbentša entšángaftaca, ba biyana bomna entšanguentšëngaftaca y quem luarentša reyëngaftaca ca.”

# 11

*Chë útata Bëngbe Bëtsabe juabna oyebuambnayata*

<sup>1</sup> Chentšana canye medídaye niñëfja šmonjanoyé, mo jatšëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše Bëngbe Bëtsábioye imojtsadorana. <sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiana endmëna; y chënga, chë uámana ca uabaina bëts pueblama, canta bnëtsana y uta shinýentscuana soyënga mochántsama chiñe jtsepochócama, mo cuaftsebotajnaycá. <sup>3</sup> Pero atše, útata atšbiana tatšëmbuata y oyebuambnayata chanjichamuá atšbe cuenta entšángbioye jábuayenama, canye uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

<sup>4</sup> Quem útata atšbiana tatšëmbuata y oyebuambnayata bontsinýinýena chë uta olivos betiyeca y chë uta candelerëseca, ntšamo Bëngbe Bëtsá, chë quem luarentše mandayabe delante endmëncá. <sup>5</sup> Nderado nda tojtseboše chatbiana bacna soye jamama, ndoñe quentatobenaye ntšámna jáborlana, er uayoicana iñeshe nanjóbcna y chë uayayëngbioye nantsapochócaye; nderado nda tojábošena chatbiana bacna soye jamama, cachcá cha buántsemna jóbanama. <sup>6</sup> Chë útata obenana

bondbomna celoca jtsachtama, ndoñe chaonduaftema, entšángbioye Běngbe Bětsabiamama chabojsabuayiyná tесе; obenana béjayěnga buiñe jtsebiāmama, y jamama quem luarentše chaotsóndbemama, n̄yetscna pochócaye soyěngaca, bueta sóynaca ntšamo chata tbojtsebošcá.

<sup>7</sup> Pero ntšamo Běngbe Bětsabiamama ibotatsěmbcá entšángbioye jábuayenama chata chabojapochocá ora, chě uabouana bayá, chě corente běts tboicana chaojabocná, chátbioye echántsatsjaye, echantsayějjaná y echantsěbaye. <sup>8</sup> Y chatbe óbana cuerpo, chě corente běts pueblentša tsáshenañe echanjoquéda, chě chatbe Utabná tmojancrucificá luarentše, y chě běts pueblo in̄yetsá juabáyamna nántsemna mo chě Sodoma y Egiptó luaroycá. Chentše endmēna mo chě běts pueblěnga Sodoma y Egiptcá, er chentše chě entšanga yapa bacna soyěnga jtsamana. <sup>9</sup> Y unga y tsěntsa tentscuana, chě obanatbe cuerpo mochantson̄yaye, n̄yetsca can̄ye luarentša entšanga, n̄yetsca cachca buiñe bomna entšanga, ba biyana bomna entšanguentšana y ba mándayěngbentša entšanga; ndoñe quenátslesenciana chata jutabuantsama. <sup>10</sup> Chata bochjóbanama, quem luarentše oyeněnga mochanjójeyuaye; tša oyejuayěnga mochántsemnama, ndayánaca mochanjénatsětaye, er ntšamo chě Běngbe Bětsabe juabna oyebuambnayata tbojanayancá, tojanma quem luarentše oyeněnga puerta chamosufrima.

<sup>11</sup> Pero chě unga y tsěntsa te tonjanochněngo ora, Běngbe Bětsá tonjanma chě obanata chábuatayenama; chentšana tbontantsata, y chě

monjétsantješnënga tša uatjana tonjanëbuache.  
 12 Chora canÿe jabuache oyebuambnayana tbonjanuena, celocana mëntšá enjétsëtsëtsnaye: “Moye mašënguata ca.” Y chatna canÿe jantšetëshiñe tbonjántsjua, y chatbe uayayënga chca monjétsonÿaye. 13 Cachora quem fshantse jabuache tontsanangmëmana, y chë bëts pueblentse bnëtsanentšana cánÿentse tontsanáshajaye, y canÿsëfta uaranga entšanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

14 ¡Chë inÿe uabouana soye quem luare japochócama, mora tocjochnëngo, pero betsko chë ústonoye uabouana pochócaye soye echanjóshjango!

### *Chë ústonoye ángelbe trompetëfjua*

15 Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama, y chë amëndayana echántsemna nÿets tempo y nÿetsca tescama ca.

16 Y chë uta bnëtsana y canta bëtsëjémënga amëndayënga, chë chëngbe uámana puestiñe Bëngbe Bëtsabe delante monjétsetbiamanënga, tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, 17 mëntšá jayanëse:

Bëngbe Utabná, Bëngbe Bëtsá nyets obenana  
 bomná,  
 aca chë mora cha condmëná y chë tempo cha  
 conjamná cbontsatschuaná,  
 er nÿa mora acbe bëts obenánaca soyënga coch-  
 jama, acbe amëndayana jóntšama.

18 Ba luarentša entsanga ácaftaca tmonjan-  
 otšatjyená;

pero chëngaftaca cmojetnama chë uabouana cas-  
 tigo jtsebínÿnama te tocjóshjango,  
 chë tempo tmojanóbanëngbiana jayanama tšabá o  
 ndoñe tšabá tmonjëftsemama.

Tonjóshjango chë hora, uacanánana jtatšatayama  
 chë acbiana oservénëngbioye,  
 chë acbe juabna oyebuambnayëngbioye, chë acbe  
 entšángbioye,

y chë acbe uabaina nyetscangbiana más bëts  
 uabainana yomnama juabnayëngbioye,  
 uámanënga y nduámanënga;

y chë tempo tonjóshjango, quem luare  
 pochocayënga jtsapochócayama ca —chënga  
 tmonjánayana.

19 Chora, Bëngbe Bëtsabe bëts yebna celoca  
 tonjantëfjo, y choye enjëtsebinÿna chë cajontema,  
 ndayëtema yojaninÿanÿná ntšamo Bëngbe Bëtsá  
 chabe entšángbioye tojanašebuachenacá; y  
 chora enjëtsemna tcuinÿënga, tša shauenanana,  
 juesasanana, quem fshantse tontsanangmëmana  
 y bëts cá bëntstá tonjantquécjana.

## 12

*Chë shembása y chë uabouana bayá*



<sup>1</sup> Chentšana, canye bęts soye celoca tonjanonyná entšanga canye soye jinyanıyama: canye shembása, shinye mo chabe uichętjoniaca, juashcona chabe shecuatšentša tajsoye, y chabe bestšašinię canye coronęsha bnętsana uta estrellęgaca. <sup>2</sup> Chę shembása ngomamaná enjętsemna, y chę šešona jónynama yojętsobecuama jabuache enjętseyoye, chę šešona jónynama cha puerte jasúfriama ibojamna causa. <sup>3</sup> Y chora inye bęts soye celoca tonjanonyná, entšanga inye soye jinyanıyama: canye uabouana dragón buanganá, canysęfta bestšašęngaca y bnętsana tsętjonęšęngaca y chę bestšašęnguię enjanábomna canysęfta coronęshangá. <sup>4</sup> Chabe uascuatšęjuaca úngaņentšana cánęentše chę estrellatémęga celocana tontsansjojó, y quem fshantsoye chętémęga tontsanętsana. Y chę dragón chę šešona jtsebomnama shembásabe delante tonjantsá, chę šešonatémbioye jtsósaņama, cha tojonyná ora. <sup>5</sup> Chora chę shembása canye šešona boyabásetema bontsanbomna, nda nyęts luarenache entšangbioye yochtsamęndaye mo canye hierro varęfjaquęcá. Pero chę šešona chábentšana tmontsanjuaná y Bęngbe Bętsábioye, chabe uámama puestoye tmontsanámbaņe. <sup>6</sup> Chę shembásana entšanga ndoyena luaroye tontsanachá, Bęngbe Bętsá canye luare ibojaboprńta choye, chentše saná chamocaredadoma, canye uaranga y uta patse y chnęnguana bnętsana tentscuana.

<sup>7</sup> Chentšana celoca canye entsjanayana enjętsemna: Miguel, chę angelęngbe

amëndayá, y chabe angelënga chë dragónaftaca monjétsentsjanaye. Chë dragón y chabe angelënga monjétsatsjanaye, <sup>8</sup> pero ndoñe chematanobená jáyëñjanama, y chëngbiana ya ndoñe más luare celoca quentétsemna. <sup>9</sup> Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtská entsángbioye aingñayá; quem fshantsoye cha tmontsantsatše, y chë cha yojanamënda angelëngnaca.

<sup>10</sup> Chora canye jabuache oyebuambnayana celoca sënjanuena, mëntśá enjétsichamo:

Chë Bëngbe Bëtsá entsanga játsebacama tempo ya tonjóshjango.

Mora Bëngbe Bëtsá echanjínyanÿiye chabe obenana y mándayana,

y chabe Uámana Uabuayaná Jesucristbe obenana jtsemándayama;

er chë Cristbe delante bëngbe catsátanga mal aque-dayá ya tmontábocna,

nda nÿets tempo Bëngbe Bëtsabe delante mal en-janaquedayá.

<sup>11</sup> Bëngbe catsátanga cha tmonjayëñjaná,

er Cristo, chë mo tmojóba Oveshatemcá, Bëngbe Bëtsá bacna soyëngama entsanga cháuaperdonama,

tonjanóbana, chabe buiñe juabuáshanëse,

y chë ndegombre soyëngama chënga monjanóyebuambnáyeca;

er chëngbe vida chëngbiana ndoñe quenjatámana; Jesucristo jaserviama jóbanama chënga monjan-prontana.

12 ¡Chcasna, celoca corente oyejuayana chaotsemna, y tsëngaftanga chë choca oyenëngbeñnaca! ¡Pero tša lastema chë fshantsoca y mar béjayoca oyenëngbiana, er chë diablo tsëngaftangbioye tonjástjango, corente tsatjayá, er cha entsetátšëmbo ya nÿe batšá yojtsábojamna chë chábioye mochjacastígama ca! — enjétsichamo.

13 Chë dragón quem fshantsoye tmojtsantsatšama tonjáninÿe ora, chë šešona boyabásetema tbonjanëshjango shembásabioye tbontsanacmé. 14 Pero uta juatëngmiásha, chë bëts aguilbeshá, chë shembásabioye tmonjaniyé, chabiana tmojanprontá luaroye chaongüefjoma, entsanga ndoyena luaroca, chë dragónbentsana bënoca; y chentše enjamna chë shembásabioye saná chamuájuatšema, unga y tsëntsa uatëntscuana. 15 Chora chë dragón, chabe uayoicana bëts béjaye tonjanbuashëtjo chë shembásabe stëtšoica, chaobuama y chabotsambama; 16 pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe. 17 Y chë dragón chë shembásabioye tondaye jamana chenatanobená causa, corente cacháftaca tbonjánetna, y tonjána chë ínÿenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecénënga, y ntšamo Jesucristo tonjanabuayená ndegombre soyëngaca sempre

imoyenënga. <sup>18</sup> Y chë dragón chë mar béjaye tsachañe tonjantsá.

## 13

*Chë dragón tonjanma, chë mar béjayoca uabouana bayá chabe obenana chaotsebomnama*

<sup>1</sup> Chentšana atše sënjaninÿe, canÿe uabouana bayá chë mar bejajoicana tonjánbocna; enjánbomna canÿsëfta bestšašënga y bnëtsana tsëtjonëšënga, y chëšënguiñe bnëtsana coronëshangá, y chë bestšašënguiñe bañe enjétsabemana Bëngbe Bëtsabiana contra oyebuambnaye uabaina. <sup>2</sup> Chë uabouana bayá sënjaninÿá enjamna mo canÿe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. <sup>3</sup> Canÿe chabe bestšašënguentše enjétsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entšanga ojnánänënga monjëtsemna, y chë uabouana bayábioye montsanëyeunana. <sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntsá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayëñjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiana chaotsóyebuambnama, y obenana tbonjanatšetá,

canta bnětsana y uta shinjěntscuana chaotsemándama.

<sup>6</sup> Y podesca Běngbe Bětsabiana tonjánayana, soyěnga chabe contra, chabe běts yebnama y chě celoca oyeněngbe contra.

<sup>7</sup> Chábioynaca tbonjanlesenciá chě Běngbe Bětsábenga imomněnga játsjayama, jáyěnanantscuana; y obenana tbonjanatsetá chaotsemándama njętsca cachca buiñe bomna entśángbeñe, njętsca canye entśángbeñe, njętsca biyañe bomněngbeñe, y njętsca mándayěngbentśa entśángbeñe.

<sup>8</sup> Chě uabouana bayá njętsca quem luarentśa entśanga mochántadorana. Chě entśanga mondměna ndēmuanjengbe uabaina ndoñe yontśábemana, chě Běngbe Bětsábioye jětschuayama mo canye oveshatemcá, tojanóbanabe librěsañe. Běngbe Bětsá quem luare cabá nděma ora, quem librěsañe tojanábema njętscanga chě tsabe vida mochjónyěngbe uabaina.

<sup>9</sup> Chě jouenama obeněnga, chamouena.

<sup>10</sup> Chě cárceloye jama ibomná, cárceloye bochanjotóca jama;

chě espadějaca jobanamá, espadějaca echanjóbana.

Chíyeca quem luarentśe entseyta, chě Běngbe Bětsábenga imomněnga padecena soyěnguiñe tmojtsemna ora, puerte uantaděnga jtsemnana y Běngbe Bětsábeñe jtsośbuáchiyana, mo chě Běngbe Bětsabe entśangcá.

<sup>11</sup> Chentśana inye uabouana bayá sěnjáninye, quem fshantsentśana enjětsebocana; uta tsětjoněše mo oveshabeścá enjánbomna, pero mo canye dragoncá, mo canya Satanásbeyeca mandanacá

enjétsoyebuambnaye. <sup>12</sup> Y enjánama soyënga chë natsana uabouana bayabe nÿets obenánaca, chabe delante. Chë fshantsentša bayá tonjanma nÿetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá. <sup>13</sup> Cha ba bëtš soyëngnaca enjánama chabe obenana entšanga jinÿanÿiyama, entšangbe delante jamana iñe celocana fshantsoye chaótsatšamnaca. <sup>14</sup> Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanëyana canÿe soye chamopormá, y chë soye cháótsinÿna mo chë natsana uabouana bayacá, chë espadějaca tëtšená enjamná, y chora tšabá enjetsatsmëná. <sup>15</sup> Y chë inÿe uabouana bayábioye tmonjanlesenciá obenana chaotsebomnana jamama, chë natsana uabouana bayábioye jadórama entšanga tmonjanma soye vida chaotsebomnana, y chë soye jóyebuambayama chaotsobenámna, y jamama chë chábioye ndoñe tmontsadoránënga chamóbanama. <sup>16</sup> Y tonjanma, nÿetscángbioye, básenga y bëtšétsanga, bomnënga y ndbomnënga, cachëngbiamá trabájayënga y nÿe ínÿabiamá nÿets tempo oservénënga, catšbioica cucuatšíñe o juentsaca chamuínÿnanama. <sup>17</sup> Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup> Chë número jinÿenamna bëtscá osertánana jt-seytana. Chë becá osertánana bomná cháuinÿena

ntsamo chë uabouana bayabe número iuayancá, er canye entsabe número endmëna. Chë número endmëna chë chnënguana patse y chnënguana bnëtsana y chnënguana.

## 14

*Chë canye patse y canta bnëtsana y canta uaranga entsangbe canto*

<sup>1</sup> Y más sëntsanonjã. Sënjaninÿe, chë Oveshatema, enjëtsatsjabna Sión ca uabaina tjoca, y cháftaca monjëtsemna canye patse y canta bnëtsana y canta uaranga entsanga, y chëngbe juentsaca enjëtsabemana chë Oveshatembe y chabe Taitabe uabaina. <sup>2</sup> Chora sënjanuena celocana canye shauenanana, mo bëtscá bëjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá. <sup>3</sup> Chënga canye tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjémënga amëndayëngbe natsanentse. Y ndocná quenjátanobena chë canto juatsjínÿana, nÿe chë canye patse y canta bnëtsana y canta uaranga quem luarentsëngbentsana atsebácanënga aíñe. <sup>4</sup> Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtsëstonana. Chënga imojamna chë natsanënga chë quem luarentsa entsanguentse atsebácanënga jtsemnama, y

chënga atsebácanënga imojtsemna Bëngbe Bëtsá y chë Oveshatema jtsaservénama. <sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

*Ntšamo chë unga angelënga tmojánayana*

<sup>6</sup> Chentšana inye ángel sënjáninye, tsbanánoca celëjana enjëtsongüefjnaye. Cha enjánbomna canye nyets tempscama oservena buayenana soye, entšángbioye jáuyanama, nyets quem luarentše oyenënga, nyetsca mándayëngbentša entšanga, nyetsca cachca buiñe bomna entšanga, nyetsca biyañe bomnëngbeñe y nyetsca canye entšangbiama. <sup>7</sup> Y jabuache mëntšá enjëtsichamo: “¡Bëngbe Bëtsabiama šmochjájuaboje cha nyetscangbiama chë más uamaná endmënama, y cha šmochtsatschuanaye, er ya tonjóshjango chë tempo ntšamo entšanga tmojamama tšabá o ndoñe tšabá bëtsemnana cha cháuyanama! ¡Chë celoca y quem luare, chë mar béjaye y nyetsca chë fshantsentšana óbocana béjayënga tojamá šmochtsadorana ca!”

<sup>8</sup> Chábentšana inye ángel mëntšá enjëtsichamo: “¡Ya bëts castigo, ya bëts castigo chë Babilonia bëts puebloca entšángbeñe echántsemna!, ndëmuanyënga tmojinyanyé ntšamo puerte bacna soyënga shembása o boyabásaftaca jtsamama y inye corente bacna soyëgnaca, y chentšana nyets quem luarentša entšanga mo cach Babilonioquëngcá tmojama. Chë causa, Bëngbe Bëtsá echanjama chëngbiámnaca chabe uabouana castigo chaotsemnana ca.”



9 Chë útatbentsana inye ángel jabuache mēntśá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesenciá chabe uinýnanana soye juentsaca o cucuatśiñe chamojajoma, <sup>10</sup> chánaca bontsemna, chë Bēngbe Bētsabe uabouana castigo jasúfriana. Entśanga puerta bacna soye tmojamama, Bēngbe Bētsá puerta tbojetna, y chë causa echanjama chë castigo chēngbeñe chaotsemnama. Y chë uámana angelēnga y chë Oveshatembe delante, chë bayá adorayábioye puerta mochanjatsetšená, íñeshe y azúfrecá. <sup>11</sup> Chca chamojtsesufrina ora, becá ngona echantsóbocana, y chë ngona nyets tempo chca echantsótsjuaye; y chēnga, chë uabouana bayá y chábioye jadórama pormana soye adórayēnga, y chabe uinýnanana soye bomnēngbiama, ndocna te chë tsetśanana queochatējbana ca” —cha enjétsichamo.

<sup>12</sup> Chíyeca quem luarentşe entseyta, chë Bēngbe Bētsabe mandēnga obedecēnēnga y Jesúsbeñe puerta oşbuáchiyana bomnēnga, chë Bēngbe Bētsabe entśanga, padecena soyēnguiñe tmojtsemna ora, puerta uantana jtsemnana.

<sup>13</sup> Chentśana canye oyebuambnayana celocana sējanuena, mēntśá ŝonjétsatsaye: “Mēntśá mábema: ‘Tśa oyejuayēnga mochántsemna chë mēntescana mochjóbanēnga, Bēngbe Utabnáftaca cánýiñe mo canýacá jtsomñēse ca.’ ”

“Aíñe ca” —chë Uamana Espíritu tonjayana —, “chēnga ya ndoñe más queochátamna jatrabájana, ni jasúfriana, er chēnga tmojama

tšabe soyënga Jesús jaserviama, y chë soyëngama chënga tšabe bendicionënga mo uacaná celoca mochanjóyëngacñe ca.”

*Ndayá chë angelënga quem luarentše tmojanat-baná*

<sup>14</sup> Chora más sënjäninÿe; sënjäninÿe canÿe fiantse jantšetëshe, y chëshiñe canÿa enjëtsetbemana. Cha enjamna mo canÿe entšacá; chabe bestšašihne enjanábomna canÿe castellano coronësha, y cucuatšihne canÿe puerte efsana mëtštá enjëtatsbëna. <sup>15</sup> Chentsana, chë celoca Bëngbe Bëtsabe bëts yebnentšana inÿe ángel tonjánbocna, y jabuache bonjëtatsaysa chë jantšetëshiñe tbemanábioye: “¡Acbe mëtštaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!” <sup>16</sup> Y chë jantšetëshiñe enjantbemaná chabe mëtštaca quem luariñe tonjánachbonja, y nÿets quem luarentše atbanániñe tonjanoquedá.

<sup>17</sup> Chentsana inÿe ángel chë celoca Bëngbe Bëtsabe bëts yebnentšana tonjánbocna; chánaca canÿe puerte efsana mëtštaca. <sup>18</sup> Y chë altarentšana inÿe ángel tonjánbocna, chë mando bomná íñesheca castigo entšangbiama jamama; y chë puerte efsana mëtštá bomna ángelbioye jabuache tbonjaniana: “¡Acbe mëtštaca machbonja y chë fshantsoca nÿetsca uvas betiyeshënguentša uvasëšangá mátabe, er ya uabochenëšangá entsamna ca!” <sup>19</sup> Y chë ángelna chabe mëtštaca quem luariñe tonjánachbonja, y nÿetsca quem luarentša uvasëšangá tonjanátabe, y

lempe chë juantsëtetjama luaroye tonjanëtsana. Chë soye entsinÿinÿná ntšamo yochtsemnana Bëngbe Bëtsabe uabouana castigo. <sup>20</sup> Chë uvasëšangana, chë bëts pueblentsana chaboye tmonjanantsëtetje, y chë luarentsana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

## 15

*Chë angelënga chë canÿsëfta pochócaye soyëngaca*

<sup>1</sup> Chentsana, inÿe bëts soye entsanga inÿe soyama jinÿanÿiyama, celoca sënjáninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaojtsemnentsana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

<sup>2</sup> Canÿe mar béjaynaca sënjáninÿe, mo cristalcalá enjétsinÿna íñeca enájuabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnama ndoñe tmonjanlesencianga. Nÿetscanga chënga monjétsabomna Bëngbe Bëtsá tojanëtsatá arpangá. <sup>3</sup> Chënga, canÿe canto monjétsecantaye ntšamo Moisés, chë Bëngbe Bëtsabe oservená tojancantacá,

y ntšamo chë Oveshatema tojancantacá. Měntšá monjětsecantaye:

Puerte bėts soyēnga y tšabe soyēnga entsemna lempe ntšamo aca tcojamcá,

Bēngbe Utabná Bēngbe Bėtsá nŷets obenana bomná;

lempe ntšamo jtsamēse aca icoyena, acbe bom-inŷiñe puerte tšabe y ndegombre soyēnga yomna,

nŷets luarēnguenache entšangbe Rey.

<sup>4</sup> Bēngbe Utabná, ħnda nanjājuaboye aca nŷetscangbiana ndoñe más bėtsá condmēna cá,

o ndoñe cmantsatschuanaye?

Nŷe aca uamaná condmēna;

nŷetsca mándayēngbentša entšanga ácbioye mochanjabo,

ácbentše mochanjoshamentšiye aca jadórama,

er ntšamo tcojamcá lempe entšángbioye mora tcojinŷanŷé,

y lempe ntšamo aca tcojamcá tšabá jtsemnana ca —monjětsecantaye.

<sup>5</sup> Chca chentšana sēnjanontješé y sēnjáninŷe chë celoca Bēngbe Bėtsabe bėts yebna tonjantēfjo, chë Bēngbe Bėtsá Moisésbioye tbojaniyé leyēnga uajajóntše. <sup>6</sup> Y Bēngbe Bėtsabe bėts yebnentšana tmonjánbocna chë canŷsēfta

angelēnga, chë canŷsēfta pochócaye soyēnga uambayēnga, uafjantse lino entšējuangá uabuashinŷinŷanējuangá uichétjonēnga, y tētša castellano uasnanējēngaca cochóntscóñe.

<sup>7</sup> Chentšana, canŷa chë canta Ainēnguentšá chë canŷsēfta angelēngbioye tonjanoyé canŷsēfta

castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná. <sup>8</sup> Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentšana, chabe buashinÿinÿanana y obenana jtsinÿanÿnayëse; y Bëngbe Bëtsabe bëts yebnoye ndocná quenjátanobena jamashënguana, chë canÿsëfta angelëngbe canÿsëfta pochócaye soyënga candochnënguëntscuana.

## 16

### *Chë castígoca copbenga*

<sup>1</sup> Chentšana, canÿe jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canÿsëfta angelëngbioye mëntsá enjétsëtsësnaye: “Motsajna y quem canÿsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luariñe tonjanbuashcja, y nyetsca entsanga chë uabouana bayabe uinÿnanana soye bomnënga y chë chábioye jadórana pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

<sup>3</sup> Chentšana, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nyetscanga chë mar béjayoca vida bomnënga tmontsanóbana.

<sup>4</sup> Chora chë inÿe ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiama. <sup>5</sup> Chentsana sënjanuena, chë béjayënguiñe mando bomna ángel mëntsá enjétsichamo:

Aca nÿetsca soyënguiñe tšabá amá condmëna, er aca tcojayana chë quem luarentša entšanga chca castigánënga chamotsemnama. Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entšanga y acbe juabna oyebuambnayëngbe buiñe chauhbuashanama, jtsëbáyëse; y mora tconjama chënga buiñe chamofšema. Nÿets mercedo imobuájona chca japásama ca — cha enjétsichamo.

<sup>7</sup> Altarocánënaca canÿe oyebuambnayana sënjanuena, mëntsá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entšanga contsacastigacá, ndegombre y tšabá entsemna ca.”

<sup>8</sup> Chentsana, chë inÿe ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entšángbioye íñesheca tontsanajuinÿé. <sup>9</sup> Y nÿetscanga uabouancá juinÿnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

10 Chentsana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa; 11 pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

12 Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinye bocanoica luarënguentša reyënga y chëngbe soldadënga chëjana chámuachnëjnama.

13 Atše sënjáninye, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinÿna.

14 Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nyets luarentša reyënga jáchembuama, chë uámana te, ndayté Bëngbe Bëtsá, chë nyets obenana bomná yochjabo entsangbiamna jabáyanama ntšamo chënga tmojamama, chë te chënga chabe contra chamotsetsjama.

15 Bëngbe Utabná Jesucristo mëntsá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiamna ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna

y chabe entšayá totsaboprontañacá, nýe enašá ndoñe chaondětsemnama, y entšanga chca tmojinýe ora ndoñe chaondětsëuatjama ca.”

<sup>16</sup> Y chë bacna espíritëngna chë reyëngbioye tmonjanënatse canýe luare, hebreuiñe Armagedón ca uabáinoye.

<sup>17</sup> Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana pues-tentšana canýe jabuache oyebuambnayana ton-janóbocna, mëntšá enjétsichamo: “¡Chë jopásama en-jamna soye ya tocjochnëngo ca!”

<sup>18</sup> Chora enjëtsemna tcuinýënga, shaue-nanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entšanga imobinýna orscana, ndocna te nýa chca quem luare tontsanëbanjó. <sup>19</sup> Chë puerte bëts pueblo úngañe tontsanojatá, y nýets luarentša bëts pueblënga tontsanáshajaye, y Bëngbe Bëtsá tojanenojuabó chë puerte bëts pueblama, Babilonia ca uabaina pueblama, chentša entšanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá. <sup>20</sup> Mar béjayoca nýetsca fshantsënga y quem luarentša nýetsca tjañe tontsanenatjëmbe. <sup>21</sup> Celocana bëtsëtsa bëntstbenga entšángbeñe tonjantquécjana, chëbenga canta bnëtsana kilama más utbenga; y entšanga Bëngbe Bëtsabe contra ba soyënga tmonjánayana, er chënga



tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnama.

## 17

*Chë puerte bacna vida bomna shembásabe castigo*

<sup>1</sup> Canya chë canysëfta angelënguentsá, chë canysëfta codbenga monjanatbënënguentsá, tonjánabo y šonjanianyana: “Mabo; cbochan-jinýinýiye ntšamo yochtsemna chë puerte bacna vida bomna shembása, chë béjayënguiñe entsetbemanabe castigo. <sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentsana chë ángel, atše chë Uámana Espíritbeyeca corente mandaná jtsemnëse, šonjanánatse entšanga ndoyena luaroye. Choca sënjáninýe canýe shembása, canýe uabouana buángana bayábeñe enjaquená; chë bayabe cuerpiñe nýétsañe Bëngbë Bëtsabiana puerte bacá oyebuambnaye uabaina enjétsabemana, y enjánbomna canysëfta bestšaše y bnëtsana tsëtjonëse. <sup>4</sup> Chë shembása enjanichëtjona uámana shbuenda uafjatsenga y buángana entsáyá, y entsanbotamana castellánoca, uámana botamana ndëtsëtémëngaca y pérlica. Chabe cucuatšiñe canýe castellano codbé enjétsatbëna, jútjena puerte uaboyënja soyëngaca, y chë boyabásengaftaca

cha tojanma puerte bacna soyëngaca. <sup>5</sup> Y chabe juentsaca canÿe uabaina enjétsabemana, ndoñe josérta soye, mëntśá: “Chë puerte bëts pueblo Babilonia, tśa bacna entśanga chentše, mo chë puerte bacna vida bomna shembásengbe bebmá cuaftsemncá; chentśana tojanóbocna quem luarentśa nÿetsca puerte uaboyënja soyënga ca.” <sup>6</sup> Atše sënjaninÿe chë shembása tëmiá, er cha tojanofśé chë Bëngbe Bëtsábenga imojamnëngbe buiñe, ndëmuanÿengbioye tmojanëbaye Jesusbiana oyebuambnaye causa.

Chca sënjaninÿe ora, tśa sënjanenjnáná. <sup>7</sup> Chora chë ángel šonjaniyana: “¿Ndáyeca tcojenjnáná ca? Atše cbochanjauyana ntśamo yojtsayana chë shembása y chë chábioye bontsambá uabouana bayá, chë canÿsëfta bestśaše bomná y bnëtsana tsëtjonëše; chë soye ndocná quenátstatsëmbo. <sup>8</sup> Chë tconjinÿe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanÿengbe uabaina quem luare jobojátśama orscana ndoñe yonduábemana, chë tśabe vida mochjónÿenëngbe uabaina iuábemana librëšañe, chënga mochanjenjnáná, chë bayá chë tempo enjaniyená y mora ya ndoñe, pero cachiñe yochjésabama chamojinÿe ora.

<sup>9</sup> “Muentše canÿe soye entsemna chë chca josértama chamojobenangbiana: chë bayabe canÿsëfta bestśaše endmëna canÿsëfta tjañe ndayiñe chë shembása entsetbemana; chë bestśašëngnaca mondmëna canÿsëfta

mandadënga. <sup>10</sup> Chentšana, shachnëngbe amëndayana ya tonjochnëngo, canya mora entsetbemana jtsamëndayama y chë inya cabá ndoñe tonjášhango. Y cha chaojášhango ora, ndoñe bënama cha queochaisemánda. <sup>11</sup> Chë tempo enjaniyena uabouana bayá pero mora ya ndoñe, endmëna chë canysëfta mandadënguentshana inye mandado, pero chánaca chë inye canysëftangcá endmëna y lempe pochocaná jtsemnama entsá.

<sup>12</sup> “Chë tconjinye bnëtsana tsëtjonëse mondmëna bnëtsana mandadënga, jamëndama cabá ndoñe tmonjójayenga; pero básefta tescama cányiñe chë uabouana bayáftaca, mando mo reyëngcá mochanjójyëngacñe. <sup>13</sup> Quem bnëtsanënga nyetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye. <sup>14</sup> Chë Oveshatembe contra mochántsentsjanaye; pero chë Oveshatema echantsayëjnaná, er chë Oveshatema endmëna nyetsca amëndayëngbiana chë más uámana Utabná y nyetsca reyëngbiana chë más uámana Rey. Chë bnëtsana mandadënga cháftaca mochántsentsjanaye ora, cha chentse chabe entsángaftaca cányiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

<sup>15</sup> Chë ángel mëntsánaca šonjaniyana: “Chë tconjinye béjayënga, ndayiñe chë bacna vida bomna shembása entsetbemana, mondmëna nyetsca canye luarentša entsanga, enutanana

entsanga, nyetsca biyañe oyebuambnayenga y nyetsca mándayëngbentša entsanga. <sup>16</sup> Y chë uabouana bayábeñe tcojinýe bnëtsana tsëtjonëse y chë uabouana bayá, chë bacna vida bomna shembásabioye mochantsáboyënja; enasá cachcá mochanjesonýaye; chabe cuerpentša mëntsena mochantsósañe y íñesheca mochántsejuinýiye, chaopochocantscuana. <sup>17</sup> Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana. <sup>18</sup> Chë tconjinýe shembása chë puerta bëts pueblo endmëna, chë ndayentša mandadënga nyets quem luarentša mandadëngbeñe mando mondbomna ca” —cha šonjaníyana.

## 18

### *Babilonia japochócoma*

<sup>1</sup> Chentšana inýe ángel sënjáninýe, celocana enjétsastjajuana, puerta obenana bomná, y chabe buashinýinýanánaca nyets quem luariñe entsanbinýna. <sup>2</sup> Chë ángel jabuache mëntsá enjétsichamo: ¡Ya mochantsepochoáca, ya mochantsepochoáca chë uámana pueblo Babilonia!  
¡Chentše tojtsóbema diablëngbe oyeniñe, nyetsca bacna espíritëngbe oyeniñe, y ndoñe tšabe y uaboyënja shloftšëngbe oyeniñe!  
<sup>3</sup> Er nyetsca quem luariñe mándayëngbentša entsanga puerta bacna soyënga tmojama chentša entsangbe causa,

mo chë bacna vida bomna shembásaftaca bacna  
 soyënga cuafjamcá,  
 mo puerte cuafjotmenangcá chë bacna vida  
 bomna shembásabe vínoyeca.  
 Nÿetsca luarënguentša mandadënga puerte bacna  
 soyënga tmojama,  
 mo chë shembásaftaca bacna soye cuafjamcá,  
 y quem luarentša obuámnañënga y enënga,  
 bomnënga tmojobiama chentša entšanga  
 yapa crocénana nÿe ndayíñnaca  
 ntsejuabnaycá gástaye causa ca —cha  
 enjétsichamo.

<sup>4</sup> Chentšana, celocana inÿe oyebuambnayana  
 sënjanuena, mëntšá enjétsichamo:  
 ¡Chë bëts pueblentšana maisebocana!, tšëngaftanga  
 chë atšbe entšanga šmomnënga,  
 chë chentša entšanga mondbétsama bacna soyënga  
 ndoñe chašmondétsamama,  
 ni chë chëngbioye japochoćama soyënga  
 tšëngaftangbiama cach ndoñe  
 chaondétsemnama.

<sup>5</sup> Chënga tša bacna soyënga tmojama, tša bëtscá nÿa  
 mo celóntscoñe cuafjojutjecá,  
 y Bëngbe Bëtsá mora entsejuabná chënga tša  
 puerte bacna soyënga tmojama causa, chë  
 soyëngama jácastigama.

<sup>6</sup> Ntšamo chentša entšanga ínÿengbiama ndoñe  
 tšabá tmonjamcá,  
 chë entšangbiámnaca cachcá chaotsemna;  
 ntšamo tmojamama, cabá uta soye más cachca  
 soye chëngbiama chaotsemna;  
 ntšamo chentša entšanga ínÿenga chamosufrima  
 tmojamcá,

chëngnaca cachcá uta soye más chamosufrí.

<sup>7</sup> Chënga corente jtsenábotamnayana y yapa crocénana nÿe ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntsá jtsejuabnayana:

“Muentse mo reyëngcá mondëtbíamana.

Viudacá ngménaca ndoñe quemuátsmëna; ton-dayama quemochátssufrina ca.”

<sup>8</sup> Chíyeca, canÿe ora pochócaye soyënga chëngbiana echanjóshjango:

jóbanama šocanënga, puerte ngménana y jabuache shëntsana,

íñsheca lempe chëngbeñe echántsejuinÿe;

er Bëngbe Bëtsá corente obenana bomná endmëna, Bëngbe Utabná chë chënga chca castigo chamotsebomnama tojayaná ca —cha enjëtsichamo.

<sup>9</sup> Quem luarentša mandadënga, chentša entsángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnaycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora.

<sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entsangbiana mochanjyana:

¡Tša lastema, tša lastema tsëngaftanga chë uamana bëts pueblo, Babilonientse oyenëngbiana, chë tša obenana binÿnentše!

Canÿe ora tsëngaftangbe castigo tojóshjango ca —mochánttsichamo.

11 Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entsangbiana, er chora ya ndocná queochátsmëna chë chënga tmojúshjango soyënga chamobuámiñama: 12 tmojúshjango castellano soyënga, midio soyënga, uámana y botamana ndëtsbënga, perlënga, uámana lino y shbuenda uafjatsënga entsáyá y sedëjua y uámana uabuángana entsáyá; nyetsca botamana uanguëtse betiyënga, marfílocá pormana soyënga, uámana niñëšëngaca pormana soyënga, bronce soyënga, hierro y marmol soyënga; 13 bëtscá canela y inye botamana uanguëtse y tamna soyënga, botamana uanguëtse bëjayënga, incienso y mirra; vínoye, aceitiye, uámana arninjá, trigo; bayënga ndayánaca uasmëmnayënga, oveshënga, couayënga, cochëshangá y entsanga nyets tempo nye inyabiana oservenëngnaca. 14 Y chë pueblentša entsangbiana mochanjayana:

¡Chë tša cmonjanogúsetana jtsebomnama soyënga,  
mora ya ndoñe quešmátsbomna;

chë uámana y buashinýinýana soyënga y tša bom-  
nana lempe šmojobuetše,

y ndocna te más cachca soye quešmochátsbomna  
ca!

15 Chë soyënga enënga, chë bëts pueblentša entsángbeyeca bomnënga tmojanobiamënga, bënoca mochanjoquéda antješna, chë bëts pueblentša entsangbiana tša bëts castiguama auatja causa; mochanjošachna, puerte ngmenánaca mochántsemna. 16 Y mëntsá chentša entsangbiana mochanjayana:

¡Tša lastema, tša lastema tšëngaftanga chë uámana  
 bëts pueblentše oyenëngbiamal!  
 Chë enjáninÿna mo canÿe shembasacá, uámana  
 lino entsëjua uichëtjoná,  
 uámana shbuenda uafjatsenga y uabuángana  
 entsáyá uichëtjoná,  
 botamananá castellánoca, perlënga y uámana bota-  
 mana ndëtsbéngaca.

17 ¡Y canÿe ora chabe tša bomnana lempe tojt-  
 sopochocá ca! —mochanjayana.

Nÿetsca chë barquënguentša mándayënga,  
 chentša entsanga inÿe luaroye ajnënga y chentša  
 trabájayënga, y nÿetscanga chë vida onguayiñe  
 mar béjayoca trabájayëngnaca, chentšana bënoca  
 mochanjoquéda antješna, <sup>18</sup> y chë bëts pueblo  
 chaojtsangbototjuanentša ngona chamojinÿe  
 ora, jabuache mochanjayana: “¡Quem uámana  
 bëts pueblécá ndocna inÿe pueblo cachcá  
 quenátsmëna ca!” <sup>19</sup> Chca chamojinÿe ora,  
 ngménama bestšašične polvëshe mochántsenotboto,  
 y mëntšá mochántseyona ošachiyënga y puerte  
 cochtsetšenánënga:

¡Tša lastema, tša lastema tšëngaftanga chë uámana  
 bëts pueblentše oyenëngbiamal!  
 Chentša bomnánaca bomnënga tmojanobiama  
 nÿetscanga chë mar béjayoca barco  
 bomnënga.

¡Canÿe ora lempe tojtsopochocá ca! —chënga  
 mochántseyona.

Chora chë ángel tonjánayana:

20 ¡Celoca oyenënga móyejuanga  
 chë pueblo chca tojapasama;



y tšëngaftángnaca móyejuanga, Bëngbe Bëtsabe entšanga, Jesucristbe ichmónënga y Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima, ntšamo tšëngaftanga chašmosufrima chënga tmojanmcá ca! —cha tonjánayana.

<sup>21</sup> Chentšana, canye ángel puerte obenana bomná, canye ndëtšbé tonjanatsbaná, mo canye bëts nantsnëbé ndëtšbecá, mar béjayoye tonjanashbuetše y mëntšá tonjánayana: Mëntšá, nye ndeolpe y jabuache, Babilonia chë uámana bëts pueblo mochántsetsatše, y ndocna te más quemochátsmëna.

<sup>22</sup> Chentše, ndocna te más quemochátuenana arpangá uabuástoyana, ni cantayana, flautëfjënga y trompetëfjuangá cach ndoñe; ndocna te más quemochátsmëna obrerënga, ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinÿanësha quemochátbinÿnaye, ni casamento fiestentša enbouenanana quemochátuenana.

Er chë bëts pueblo chca mochantsepochoáca, masque chentša obuámnañënga y enënga nyets quem luarentše chë más bomnënga monjamna, y chentša bocjuanánaca nyetsca luarënguëntša entšanga ingñënënga monjamna ca —cha tonjánayana.

<sup>24</sup> Bëngbe Bëtsá chca chë bëts pueblentše echanjama, er chentše tmojinÿena chë Bëngbe Bëtsabiamna trabájaye causa tmojanóbanëngbe buiñe; chë chabe

juabna oyebuambnayënga, chabe entšanga, y chë chábioye oservénama nyëts quem luarentše tmojtsëbayëngbe buiñe.

## 19

<sup>1</sup> Chentsana celoca sënjanuena mo mallajta entšanga cuaftsayebuachcá, mëntšá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entšanga tojat-sebacá;

cha puerta uámanana, buashinÿinÿana y mando endbomna,

<sup>2</sup> er ndayama cha tojayancá ndegombre jtsemnana,

y ntšamo tšabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerta bacna soyënga causa, nyëts luarentša entšágnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomere-cencá,

chábioye oservënënga chë shembásabeyeca tmojóbana causa ca —chënga monjétsichamo.

<sup>3</sup> Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyëtsca tescama chca echanjótsjuayeca!

<sup>4</sup> Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentšé, y Bëngbe Bëtsá, chë uámana

tbemanentše enjétssetbemanabioye tmonjanadorá,  
 mēntšá jayanēse: “¡Chca chaotsemna! ¡Bēngbe  
 Utabná matschuanga ca!”<sup>5</sup> Y chē uámana  
 puestentšana canýe oyebuambnayana  
 tonjanóbocna, mēntšá:

Bēngbe Bētsá matschuanga, nýetsca chabe os-  
 ervénēnga

y chē nýetscangbiana cha chē más uamaná  
 yomnama juabnayēnga,

básenga y bētsétsanga ca.

### *Chē Oveshatembe casamento fiesta*

<sup>6</sup> Y sējanuena mo mallajta entšangbe  
 oyebuambnayancá, mo bētsá bėjaye  
 cuaftsobonjnacá y mo bēts juesasanana  
 shauenanancá; mēntšá monjétsichamo:

¡Bēngbe Utabná matschuanga!

Er Bēngbe Utabná, Bēngbe Bētsá nýets obenana  
 bomná tojontsé jamándana.

<sup>7</sup> Puerte móyejuanga y mochjínýanýiye

Bēngbe Bētsá puerte bētsá y uamaná bétsemnama,  
 er mora entsemna mo chē Oveshatembe casa-  
 mento te cuaftjoshjangcá;

chabe shema yochjabocná puerte tojtenobotamá;

<sup>8</sup> tmojalesenciá cha chauatíhētjo uámana, ndu-  
 atsenga uafjantse y uabuashinýinýana lino  
 entšayá.

Chē shema entsinýinýná chē Bēngbe Bētsabe  
 entšanga;

y chē lino entšayá jtsichétjonana entsinýinýná  
 chēnga lempe ntšamo tšabá yomncá jtsamēse  
 imoyena ca —chēnga monjétsichamo.

<sup>9</sup> Chentshana chë ángel šonjaniyana: “Měntšá mábema: ‘Oyejuayënga chë Oveshatembe casa-mento fiestama ófjanënga ca.’ ” Y mēntšánaca šonjaniyana: “Chca, ndegombre Bëngbe Bëtsabe palabrënga endmëna ca.”

<sup>10</sup> As chabe shecuatsëntše sēnjanoshamentšé cha jadórama, pero cha šonjaniyana: “Ndoñe, átseftaca ndoñe chca mátamana, er atše Bëngbe Bëtsabe canye oservená sēndmëna, ntšamo aca condmëncá, y chë Crístbeyeca acbe catšátanga, ntšamo chabi-ama motatsëmbcá y chabe ndegombre palabrënga nyets tempo imabuayiynanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entsángbioye jábuayenama.

### *Chë fiantse couayiñe enjaquená*

<sup>11</sup> Chora sēnjáninye celoca atëfjniñe; canye fiantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entsángaftaca; y chca chabe uayayëngaftaca monjánentsjanaye. <sup>12</sup> Chabe fšñëbenga mo iñeshcá enjáninýna, bestšasiñe ba uabuashinýnana coronëshangá enjanábomna, y canye uabaina chábeñe enjanábemana; nye cha chë uabaina yojanábuatma. <sup>13</sup> Cha enjanichëtjona buiñeca unëtjona entsáyá y chabe uabaina enjamna “Bëngbe Bëtsabe palabra ca”. <sup>14</sup> Y

chabe ústonoye monjétsajna mallajta soldadënga celoquënga, nduatsenga uafjantse y uámana lino entšayá uichétjonënga, fjantse couayënguifne enjaquenënga. <sup>15</sup> Chë enjétsesnatsanabe uayoicana enjanóbocana canye puerte efsana espadëja, chë Bëngbe Bëtsábeñe ndošbuáchiyënga játatsetsama. Cha puerte obenánaca echántsamëndaye, mo canye hierro varëfjaquécá. Cha echanjama entšángaftaca mo nda uvasësangá juantsëtetjama tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nyets obenana bomná tbojetna causa. <sup>16</sup> Chabe uabonjaníyañe y chabe mëntjoca canye uabaina enjanábemana: “Nyetsca reyëngbiana chë más uámana Rey, y nyetsca amëndayëngbiana chë más uámana Utabná ca”.

<sup>17</sup> Chentsana canye ángel sënjáninye, shinýiñe enjétsatsana, chë celoca tsbanánoca nyetsca monjanongüefjná shloftšënga jabuache mëntšá enjétsëtsësnaye: “¡Mabënga, menefjna chë Bëngbe Bëtsá tojaprontá bëts saná jasama; <sup>18</sup> chašmosama reyëngbe mëntšena, soldadënga amëndayëngbe mëntšena y valente entšangbe mëntšena, couayënga y chëngbeñe enjaquenëngbe mëntšena, y nyetsca entšangbe mëntšena, cachëngbiana trabájayënga y nye ínýabiana nyets tempo trabájayënga, básesenga y bëtsëtsanga ca!”

<sup>19</sup> Chora atše sënjáninye chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jéntsajama. <sup>20</sup> Chë uabouana bayá tmonjanotbá, y cháftaca chë

Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinÿanÿiyama; y cha chë soyëngaca tojanaingñé chë uabouana bayabe uinÿananana soye chamuayentsjajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetše chë ññesheca uafjajónayoye, chë azufre endëjuinÿinÿanentše. <sup>21</sup> Chë inÿengbioyna tmontsanapochocá chë fjantse couayiñe enjaquenabe uayoicana enjanóbocana espadéjaca, y nÿetsca shloftšënga chëngbe mëntsénaca yapa tmontanoshachá.

## 20

### *Chë uaranga uata*

<sup>1</sup> Chentšana canÿe ángel sënjaninÿe celocana entsanastjajuana chë corente asentoye tboca llavéjaca, y canÿe bëts cadenëjua entsanëtvena. <sup>2</sup> Chë ángel tbontsantbá chë dragónbioye, chë tempsca mëtšcuaye, chë Diablo y Satanás endmëná, y canÿe uaranga uatama tbontsanbátsëca. <sup>3</sup> Chë corente asentoye tboye tbontsantsatše, chentše tbontsanëtame, y chentše bësáša tsengájašëca tonjaninÿaná, ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtsboshjona.

<sup>4</sup> Uámana puestënga sënjaninÿe, y chiñe tmonjanotbiana chë entsanga tšabá o ndoñe

tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjánanyë. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinýnanana soye juentsaca o cucuatšinë chamuayentsjajoma. Y sënjáninýe chëngna tmontanayena y Crístoftaca canýe uaranga uatama montsanmánda. <sup>5</sup> Chë entšanga mondmëna chë natsanënga jtayenama, pero chë tempo chë inýe obanënga ndoñe chemëntëtanayena, ndayá nýe chë canýe uaranga uata chentšana. <sup>6</sup> ¡Oyejuayënga y Bëngbe Bëtsabe entšanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nýetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crístoftaca chë uaranga uatama mochántsemandaye.

### *Satanás japochócamá*

<sup>7</sup> Chë uaranga uata chaojochnëngo ora, Satanás chabe utámenocana mochanjétsboshjona; <sup>8</sup> y cha echanjábocna nýets luarentša entšangbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entšanga echanjáchembo Bëngbe Bëtsabe contra jéntsjava, y tša chëftanga cha

echanjáchembo, n̄ya mo ch̄e mar b́ejaye ch̄en̄yoca cascajcá mochántsemna.

<sup>9</sup> Ch̄enga n̄yetscanga n̄yets luarējana mochanjátsjua, y ch̄e B̄engbe B̄etsabe entsanga oyenent̄se y chabe bonshana entsangbe b̄ets pueblo sh̄econana mochanjotsaye. Pero celocana iñe echanjatquécjana y ch̄e B̄engbe B̄etsabe contra imomn̄enga lempe echántsajuin̄ye. <sup>10</sup> Y Satanás, ch̄e aingñayá, mochántsatmet̄se ch̄e iñeshe y azúfrecá uafjajónayoye, ndayent̄se ch̄e uabouana bayá y ch̄e B̄engbe B̄etsabe ndoñe ndegombre juabna oyebuambnayá tmontsanatmet̄se. Chent̄se b̄ets castigo n̄yets tempo, bn̄eté y ibeta mochanjasufrina.

*Ch̄e oban̄ngbiana tmonjánayana nt̄samo ch̄engaftaca jamama yojtsemnana*

<sup>11</sup> Chent̄sana s̄enjánin̄ye can̄ye b̄ets uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatj̄emba, y ndóc̄nent̄se más chenatanobin̄yná. <sup>12</sup> Y ch̄e oban̄nga s̄enjánan̄ye, b̄ets̄etsanga y básesenga, ch̄e uámana puestent̄sa natsanoica monj̄étsatsana; y ch̄e libr̄eshangá tmonjan̄et̄fjo, y in̄ye libr̄eshanaca, nd̄emuan̄yenga n̄yetsca tescama t̄sabe vida mochjón̄yen̄engbe uabaina uabemana libr̄ésha. Ch̄e oban̄ngbiana tmonjánayana nt̄samo ch̄engaftaca jamama yojtsemnana, cach̄enga vida imojábomna ora nt̄samo tmoj̄éftsema soȳngaca, nt̄samo ch̄e libr̄eshangañe yojanabemancá. <sup>13</sup> Ch̄e mar b́ejayoye tmojanóban̄nga choicana tmontanbocna, y ch̄e oban̄nga tmojanoquedanga luar̄enguent̄sana



tmontanbocna, y cada cánÿabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. <sup>14</sup> Chentšana ya ndoñe más obenana quentétsemna entšanga chamóbanama chaomama, mo chë obenana chë íñesheca uafjajónayoye cuaftsëtsencá; quem íñesheca uafjajónaye endmëna chë nÿetsca tescama castigo jtsebomnama luare; chë choca castigánënga jtsamnama yojtsamnëngbiama entsemna mo chënga cachiñe cuafjatobancá; <sup>15</sup> y ndëmuanÿengbe uabaina chë tšabe vida mochjónÿenëngbe uabaina iuábemana libréšañe ndoñe yonjanabemana, chë íñesheca uafjajónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentšana atše sënjáninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar béjaye chora cach tondaye. <sup>2</sup> Sënjáninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjëtsostjajuana, puerta botamaniñe, mo canÿe shembása puerta botamananacá, chabe boyá jábocnabiama. <sup>3</sup> Y chora canÿe jabuache oyebuambnayana Bëngbe Bëtsabe uámana puestentsana sënjanuena, mëntsá: “Mouena. Bëngbe Bëtsá entšángaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá

chëngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngménënga chamondëtsemnama, y ndoñe más chamondóbanama, ndoñe más chamondošachema, ni ngménaca ndoñe chamondëtsóyebuambnama y ndoñe más tsetšanana chamondëtsebomnama; er ntšamo chënga entsāngcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentse enjantbemaná šonjaniyana: “Atše lempe mo tsëm soyëngcá sëndbama ca.” Y mëntsánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

<sup>6</sup> Chentšana šonjaniyana: “Lempe tonjochnëngo. Atše sëndmëna chë nyetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojtsebomná canye béjaye fshantsiñe obocanentšana cuafjofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nyetsca tescama yomna tšabe vídnaca, chca jtsebomnama chábioye tondaye ntsotjañcá. <sup>7</sup> Nda nyetsca soyënguentsana tšabá chaojabocná mo ayënjanayacá, lempe echanjóyëngacñe ntšamo atšbe entsāngbioye jatšatayama tijašebuachenacá, y atše chabe Bëtsá chántsemna y cha atšbe uaquiñá. <sup>8</sup> Pero chë auatja causa Crístbioye ndoñe mondëservënga, chábeñe ndošbuáchiyënga, chë bacna soyënga causa Bëngbe Bëtsabiana puerte uaboyënjanënga

imomnënga, chë ínÿengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nÿetscanga bosterënga imomnëngbiamna, chënga entsamna chë íñesheca uafjajónayoca jasúfriana, chë azufre yojuínÿinÿanentše. Chentše puerte castigánënga sempre mochanjëftsemna, mo uta soyama cuafjobancá ca.”

### *Chë tsëm bëts pueblo Jerusalén*

<sup>9</sup> Chentsana canÿa chë angelënguentśá, chë canÿsëfta copbenga bomnënga jútjena chë canÿsëfta ústonoye pochócaye soyëngaca, átšbioye tonjánabo y šonjaniyana: “Mabo, cbochanjinÿinÿiye chë tojobouamá shembása, chë Oveshatembe shema ca.” <sup>10</sup> Y atše chë Uámana Espíritoftaca corente mandaná jtsemnëse, chë ángel šonjanánatse canÿe bëts y tsbanana tjoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábiocana enjëtsostjajuana. <sup>11</sup> Chë bëts pueblo enjëtsebuashinÿinÿana Bëngbe Bëtsabe buashinÿinÿanánaca; enjëtsebuashinÿinÿana mo canÿe uámana botamana ndëtsbecá, mo jasje ndëtsbecá, pero mo cristalca tëshinÿniñe. <sup>12</sup> Chë bëts pueblo shëconana canÿe bëts y tsbanana tapiëse enjamna, chë tapiëšiñe bnëtsana uta bëshashangá y cada bëshashentše canÿe ángel, y chë bëshashangañe enjanábemana chë Israeloca bnëtsana uta bëts pamíllangbe uabaina. <sup>13</sup> Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga

běšashangá, y tsmanoica unghashá. <sup>14</sup> Chě tapiěše enjaněcuatjona bnětsana uta ndětsbenguiñe, y chěbenguiñe enjanábemana Jesucristo chě Oveshatembe bnětsana uta ichmóněngbe uabaina.

<sup>15</sup> Chě ángel átšeftaca oyebuambnayá canye castellano juinýnaněšěfja enjánatběna jamedídama chě běts pueblo, chentša běšashangá y chentša tapiěše. <sup>16</sup> Chě běts pueblo cach medida enjانبomna nýets cantoica, cach medida těntsoye y nýanějoye. Chě ángel chabe juinýnaněšěfjaca chě běts pueblo tonjanmedidá: enjانبomna uta uaranga y uta patse kilómetrěnga; těntsoye, tsbanánoye y nýanějoye cach medida enjانبomna. <sup>17</sup> Chentšana chě tapiěše tonjanmedidá, enjانبomna chněnguana bnětsana y shachna metrěnga; ntšamo entšanga chca soyěnga jamedídama mondětatsěmbcá chě ángel tonjanmedidá.

<sup>18</sup> Chě tapiěše enjanpormana jaspe ndětsbeca, y chě běts pueblo ena castellánoca, tša chca nýa mo cristalcá těshínýniñe enjáninýna. <sup>19</sup> Chě ndětsbenga ndayiñe chě tapiěše enjaněcuatjona enjانبotamanana nýetsca uámana botamana ndětsbéngaca: canyěbé jaspe ndětsbeca, chě inyěbé zafíroca, chě inyěbé ágata ndětsbeca, chě inyěbé esmeráldaca, <sup>20</sup> chě inyěbé ónice ndětsbeca, chě inyěbé cornalina ndětsbeca, chě inyěbé crisólito ndětsbeca, chě inyěbé berilo ndětsbeca, chě inyěbé topácioca, chě inyěbé crisoprasa ndětsbeca, chě inyěbé jacíntoca y chě inyebena amatista ndětsbeca. <sup>21</sup> Chě bnětsana uta běšashangá enjuamna bnětsana uta perlěnga; cada běšáša

nÿe canÿe pérlica uapormanésha. Y chë más bÿets tsáshenëjana enjamna ena castellánoca; mo cristal cá tëshínÿniñe enjáninÿna.

22 Chë bÿets pueblentse ndocna Bëngbe Bÿetsabe bÿets yebna chiyátaninÿe, er Bëngbe Utabná, chë Bëngbe Bÿetsá nÿets obenana bomná y chë Oveshatema chentse bonjamna, y chata nÿetscangbiana chë bÿets pueblentse ndayétsnaca adoránata bonjésemna. 23 Chë

bÿets pueblentse ndoñe quenjatsiyta shinÿe o juashcona chaotsebínÿnaye, er Bëngbe Bÿetsabe buashinÿinÿanana chentse enjésebinÿnaye, y chë Oveshatembe buashinÿinÿanana mo uajuinÿanëshacá enjamna chë bÿets pueblama.

24 Chentša binÿnayánaca, entsanga nÿetsca mándayëngbentse mochantsiyena, y quem luarentša mandadënga chëngbe uámana y bÿets soyënga chë bÿets puebloye mochanjiyëbo.

25 Chë bÿets pueblentša bÿeshangá ndocna te quemochtétatame, y chentse ndocna ora ibeta queochátsmëna. 26 Chë bÿets puebloye mochanjiyëbo chë nÿetsca luarënguentša

entsangbe uámana y bÿets soyënga, y chë nÿetsca luarënguentša entsángbeñe bÿetsétsanga y uámanënga iuabiamná soyëngnaca. 27 Pero

ndocna te queochatómashëngo ndayánaca, y chë soye chaotsama entsanga ndoñe tsábenga chamotsemnama Bëngbe Bÿetsá jadórama; ni ndocná queochátamashëngo, Bëngbe Bÿetsabiana nÿa tondayama ogustana soyënga amá o ínÿengbioye jáingñama soyënga amá. Choye mochanjámashjna nÿe chë ndëmuanÿengbe uabaina yojsábemana chë

Oveshatembe librěšaňe, chě nyetsca tescama tšabe vida mochjónyēngbe uabaina uábemanentše.

## 22

<sup>1</sup> Chě ángel šonjaninýinýé chě enjanobějna bėjaye vida bomniye. Chě búyeshe enjamna ndětsenguiye y těshínýniye mo cristalca. Enjanóbocana chě Běngbe Bětsá y chě Oveshatembe uámana puestocana, <sup>2</sup> y chě más běts tsashená tsěntsajana enjanobějna. Chě fshajayentša catoica lado enjanójuajna betiyeshēnga chě nyetsca tescama yomna tšabe vida jtsebomnama, canýe uatiňe bnětsana uta soye jashájonana, canýe cada shinýe; chě betiyeshentša tsbuanáchēnga josérviana nyetsca mándayēngbentša entšanga jáshnama. <sup>3</sup> Choca ndocna soye queochátsmēna chě ndayama Běngbe Bětsá tojayana ndoňe tšabá yondmēna ca, y ndaye bacna soye japásama chaotsemna soye. Chě Běngbe Bětsá y chě Oveshatembe uámana puesto chě běts pueblentše echántsemna, y chatbe oservénēnga mochántšadorana. <sup>4</sup> Chēnga mochanjinýe Běngbe Bětsabe jubiá, y chabe uabaina chēngbe juentsaca mochantsambaye. <sup>5</sup> Chentše ndocna ora ibeta queochátsmēna, y chentša oyenēnga ndoňe queochátějajoto canýe uajuinýaněsha o shinýe chaotsebínýnaye, er Běngbe Bětsá Běngbe Utabnabe buashinýinýanana chēngbiana echantsebínýnaye, y chēnga mochántsemna mo reyēngcá uámanēnga, y Běngbe Bětsáftaca nyetsca tescama mochántsemandaye.

*Jesucristo jésabama entsobeco*

6 Chentšana chë ángel šonjaniyana: “Quem palabrénga endmëna ntšamo ndegombre yomncá, y nyetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinýanýiyama ndayá betscó yojtsemna jopásama ca.”

7 Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librësañe entsábemana ca.”

8 Atše Juan, chë soyënga sënjanuena y sënjaninýe. Y chca sënjanuena y sënjaninýentsána, chë chca šonjaninýinýé ángelbe delante atše sënjanoshamentsé, cha jadórama. <sup>9</sup> Pero cha šonjaniyana: “Ndoñe, átšeftaca ndoñe chca mátamana, er atše canýe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nyetscanga chë ndayá quem librësañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

10 Chora mëntšánaca šonjaniyana: “Ndoñe mo iytëmencá catjáboshjona ndayá quem librësañe entsabemancá, chë ndegombre jochnënguama soyënga, er chca jopásama chë tempo ya entsobeco.

11 Cachcá monýá chë bacna entsá bacna soyënga

chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseserverna ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. <sup>13</sup> Atše sëndmëna chë nÿetsca soyënga bojatšayá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanána jashjáchama, mo chë nÿetsca tescama yomna tšabe vida jtsebomnama betiyeshentšana cuaftsescá, y mochanjobenaye chë tsëm bëts puebloye bëšásajana tšabá jamashjnama. <sup>15</sup> Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nÿetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše



sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davidbentsana Entšá. Atše sëndmëna mo chë bínýanoye puerta bínýnaye estrellcá ca.”

17 Chë Uámana Espiritu y chë Oveshatembe shema bondbétsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá bėjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nýetsca tescama yomna tšabe vídnaca, chca jtsebomnama tondaye ntsotjañcá.

18 Nýetscanga ntšamo quem librëšaňe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšaňe entsábemana pochócaye soyënga. 19 Y nderado nda ntšamo quem librëšaňe entsabemancá, chë ndegombre echanjopásama soyënguiňe ndayánaca tojajuaná, Bëngbe Bëtsá chábioye bochantsebojuána ntšamo chabiamama yomncá chë nýetsca tescama yomna tšabe vida jtsebomnama betiyeshentsana y chë tsëm bëts pueblentsana, chë ndayama quem librëšaňe entsábemana.

20 Quem soyënga oyebuambnayá, chë lempe ndegombre echantsemnama tonjayaná, atše, Jesús sëntsichamo: “Aíňe, betscó chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tšabe bendicionënga tšëngaftangbeñe chaotsemnama.

## **Bëngbe Bëtsa Cabëngaftaca Entsoyebuambna New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
19104c0e-9046-5ff3-82fb-eb838c88dcf9